

桂洲奏議

補遺 廿之一

冊	函	號	類
一	〇	一	漢書門
〇	〇	二	
〇	〇	三	
〇	〇	六	
〇	〇	九	

冊	函	號	類
一	〇	一	漢書
〇	〇	二	
〇	〇	九	
〇	〇	八	
〇	〇	七	
〇	〇	三	
〇	〇	二	

番號	漢	8912
冊數	10	(10)
函號	287	39



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



桂洲奏議第二十卷

南宮集卷之十一目錄

請復古聖祀典疏

正體統以戒躁妄疏

奉議三后神主遷陵疏


慶賀萬壽節謁陵禮成疏

覆議三后神主奉遷陵殿疏

乞請購求古今藏書疏

奉諭景神殿奉安御容儀節疏

糾儀疏



桂洲奏議

目錄

忠孝堂書院

奉慈三后主奉各陵疏

請定廟成樂章疏

欽奉聖諭疏

慎選貞淑以充妃嬪疏

秋祭七陵奉諭禮儀開坐上請疏

奉議三后神主名實更正疏

進呈祀冊疏

叅劾定西侯蔣傳奏討蟒衣疏

大慶疏

大慶疏

奉諭地震加修省免大慶疏

奉議遷三后神主奉安陵殿擬儀疏

奉勅更正皇考廟名疏

欽奉聖諭疏

欽奉聖諭疏

以上十五年十月以前稿

桂洲夏文愍公奏議第二十卷

如

門人

涇縣左

鑑

宣城貢汝成

編輯

校正

華亭徐

階

武進薛應旂

裔孫

之瑞

重訂其

灑瀾

全校字

南宮集卷之十一

禮部題

請復古聖祀典疏

祠祭清吏司案呈奉本部送禮科抄出巡按陝西監察御史周鈇等題據陝西布政司經歷司呈奉本司劄付蒙臣批據西安府武功縣申據本縣儒學生員楊立等

呈稱本縣原係堯封后稷有邰之地與其母姜嫄俱各有廟見存鄉民雖云歲時奉祀然明祀尙缺見今伏羲廟在秦州者已蒙奏請降有明祀况后稷功在萬世而聖母姜嫄又堯封后稷主祀於此者如蒙轉申乞爲奏請施行等因蒙批布政司卽會提學道查議回報蒙此該本司掌印右布政使文明會同按察司提學副使龔守愚議照祭法及春秋外傳曰法施於民則祀之以死勤事則祀之后稷之功著於唐虞被於後世勤百穀而死所謂法施於民以死勤事稷實兼之故商人以棄代柱配享穀神由漢以來莫之敢廢今社稷壇旣無配享

而武功縣又無專祀誠爲缺典查得鞏昌府秦州乃伏羲所生之地該巡按御史馮時雍奏奉欽依修建廟宇歲時致祭今武功即古之有邰后稷所生之地也獨無其祀可乎且伏羲畫卦則圖后稷播降百穀功在萬世尊崇明祀固當並舉者也若夫稷母姜嫄周時雖嘗立廟然以今日觀之事體則有不同何者后稷之功及於萬世姜嫄之功止於周家也且姜嫄爲周之鼻祖而周人東向之尊配天之祭但以后稷不以姜嫄又周禮諸后之廟皆設女祧以守之彼親爲子孫猶且嚴謹如是今經數千載不歆非類將使何人主其祭乎是故后稷

不就封則不可即有部而立家廟成王不御宇則不可用盛樂以享先妣誠以舍此二者義無所當也唯老子釋迎之母則世俗有祀之者吾儒可效之乎或謂姜嫄之廟有啓聖公事例可據是又不然夫啓聖之祀本緣顏路曾皙伯魚歷於其子故因而別祀之未聞又祀孔母顏徵在也復何疑焉合無奏行禮部議擬比照伏羲廟祀將該縣后稷廟委官重修仍僉廟戶二名看守及行翰林院撰擬廟額并祭文每歲春秋仲月量支無礙官銀備辦牲醴致祭其舊有姜嫄廟亦不可毀止聽民間舉祀等因到臣爲照崇德報功朝廷之典禮古今之

通義當堯之時棄爲后稷教民稼穡樹藝五穀五穀熟而民人育治成當時澤流後世武功所生之地是方之人慕餘風而起敬瞻遺跡以興思值此聖作物觀之時禮樂更新之會宜爲是請以成久缺之典也所據布政司提學道各官所議似爲明盡相應俯從如蒙勅下禮部再加詳議如果司道之議典禮有據乞查伏羲秦州廟祀事例額定祭品每歲行令該縣知縣春秋仲月舉行仍行翰林院撰擬廟額祭文請自上裁以示崇重原有廟宇聽臣委官量加修飾就於本縣均徑內僉廟戶二名常用看守其姜嫄古跡廟亦存之聽民間自行

舉祀如此則下可慰一鄉士民之心。上可伸萬世粒食之報。中可成千年久缺之典。其於世教不無少補。等因。題奉旨禮部知道。欽此。欽遵抄出。送司案呈到部。看得巡按陝西監察御史周鈇等題稱。陝西西安府武功縣堯封后穆與其母姜嫄俱各有廟。見存乞要比照秦州先年伏羲廟事例。將原有廟宇量加修飾。賜額撰文。春秋致祭。僉撥廟戶看守。其姜嫄古廟亦聽民間自行舉祀一節。爲照后穆教民稼穡開萬世粒食之源。神功盛德克配彼天遺思在人。伏蒙聖明釐正祀典。茲已崇祀太穆足報其功。但稱武功。乃其肇生之地。向無專祀。似

爲缺典。既該本官考議明白。具奏前來。相應依擬合候命下之日。本部行移翰林院撰擬廟額并祭文。及行陝西布政司轉行該府有司官員。即將原遺廟宇舊址量行修飾。仍僉撥廟戶一人看守。每歲春秋量支無礙官錢備辦祭品。就令該縣掌印官致祭。其舊有姜嫄古廟亦不可廢祀。庶崇報之典益加隆矣。

嘉靖十五年六月初三日具題。初五日奉旨依擬。

正體統以戒躁妄疏

近該本部辦事進士盧榎先於六月內上疏言事已蒙
旨允納本月初二日午時臣等於後堂辦理文書榎復
趨入遞送揭帖一本又云上疏言事問之已於三日前
進訖查得本官先次進本將揭帖遍送各衙門堂上官
第四日始聞於臣等今次亦於進本之第三日始來後
堂遞送揭帖臣等竊照朝廷之上凡事有體進士係新
進儒生初試官政未嘗更事與見任授職者不同尤當
謹守規矩專聽約束即欲進言當先呈稟本堂上官如
其所言公而是堂官必無阻抑之理如或所言私而非

則自當聽堂官可否此與許諸人直言無隱之例不同
故事惟十三道御史言事必封進後方呈遞揭帖於都
察院堂上官蓋御史乃言官又風憲之職不先聞於都
御史防其或得以制之也實祖宗設官意也此又與各
衙門進士言事者不同參照進士盧榘旬日之間兩上
封事多口瀆聽已涉出位之嫌徑情直行罔循屬吏之
分若不明正事體恐少年新進爭先倣倣養成輕躁之
風有損敦大之治如蒙乞勅法司提問如律仍通行禁
飭今後九卿各衙門屬官及進士凡有上疏言事務先
呈稟本衙門堂上官如所言允合公論有補治理不許

堂上官循私阻抑如挾私妄誕即加禁止庶政體有補
而新進者亦知所取正矣

嘉靖十五年七月初五日奉旨是盧榘輕躁瀆奏已
有旨着吏部叅看了今後各衙門屬官都照這所奏
行

奉議三后神主遷陵疏

嘉靖十五年六月初一日該本部尚書夏言欽奉聖諭
廟重於陵禮制故嚴今廟中凡帝以一后配惟陵則二
三后以配葬夫如是其廟祀陵祀已不同今復建奉慈
殿不如奉主於陵殿爲合禮又梓宮既配葬于帝主無
祔廟之禮宜在陵殿今別置之近於黜者非親之也此
亦關乎典禮卿其會議以行欽此該本部尚書夏言會
同大學士李時已經回奏續於本年七月初七日節奉
聖諭比因奉遷三后神主卿部裏可會官議之欽此欽
遵齋捧到部臣等看得三后神主奉遷陵殿事關典禮

必須多官集議務合禮制期於至當垂之永久庶足以
仰副皇上尊祖敦禮之意合候命下本部會同內閣五
府六部九卿衙門詹事府翰林院國子監并科道等官
會同集議具奏上請定奪

嘉靖十五年七月初十日具題十一日奉旨是

慶賀萬壽節謁陵禮成疏

節該本部題嘉靖十五年八月初十日恭遇萬壽聖節
文武百官各具朝服先於本月初七日初八日俱赴靈
濟宮習儀至日早行慶賀禮等因題奉旨照上年例儀
行欽此隨該本部題稱萬壽聖節與尋常朝賀不同外
而四夷陪臣萬里貢琛闕廷內而天下藩臬諸司及在
廷大小臣工歡欣鼓舞願祝聖壽無疆之慶此臣子忠
愛之誠所當盡者上年屢奉勅旨以列聖神主未還廟
暫罷今太廟工完已久已嘗舉行禘禮羣廟行且告成
展敬有日矧今歲皇上謁陵禮成凡皇上所以隆孝敬

于祖考者可謂極其至矣惟是臣子獻忠稱慶之忱不
得申于萬一羣情未安伏惟皇上俯徇中外臣民忠敬
之私今次慶賀大禮合無特賜俞允其習儀慶賀一應
全禮照常舉行庶夷夏交歡臣民胥慶臣等無任惓惓
懇祈之至等因奉旨覽卿等所謂朕具悉忠敬止今一
次必待祖宗神主回廟庶終朕情照去年行欽此欽遵
抄捧到部臣等仰見皇上下大孝至情必俟祖宗列聖神
主既安廟享方允舉行全禮皇上謙撝至德尊顯孝思
真遠過百王光于千古臣等莫罄贊揚敢昧將順聖諭
止照上年例儀似爲大簡臣等微誠終懷未盡合無照

依今歲正旦節事例暫免習儀八月初十日早皇上具
皮弁服御奉天殿錦衣衛陳設大駕鹵簿於丹陛丹墀
內中外百官各具朝服先行四拜禮鴻臚寺官仍即丹
陛具班首官名致詞稱賀畢復行四拜禮其公侯駙馬
伯進到綵段并各處方物馬匹俱暫免陳設先於八月
初九日類進內府各該衙門交收其各王府及天下文
武衙門進到表文亦暫免陳設宣讀於八月初十日早
仍用鼓樂迎至午門外司禮監官照例捧進俱候命下
行令各該衙門遵奉施行

嘉靖十五年七月十三日具題十五日奉旨是儀依

但朕服常服百官只具公服行禮欽此

覆議三后神主奉遷陵殿疏

該禮部題等因奉旨是崇先殿比之不同周人祀后彼
 係始祖之母今奉慈殿但存名耳四時之祭舞樂俱無
 便會官議擬來說欽此欽遵臣等會同大學士李時武
 定侯郭勛吏部左侍郎張邦奇等集議臣等竊惟禮嚴
 尊祖祀重廟享自古天子惟一帝一后配享于廟所生
 大母別薦于寢身沒而已斯禮之正是故禮有享先妣
 之文周之闕宮宋之別殿皆此義也國朝廟制稽古惟
 一后配帝禮莫嚴焉孝宗皇帝乃於奉先殿側特建奉
 慈殿別祭孝穆皇太后後祔孝肅太皇太后近復祔孝

惠皇太后於內是蓋子祀生母以盡終身之孝焉爾然
禮於妾母不世祭疏曰不世祭者謂子祭之于孫則止
蓋父之所尊子不可以不承父之所異子不敢同明其
宗耳蓋繼祖重故不復顧其私祖母也今日陛下于孝
肅太皇太后曾孫也于孝穆皇太后孫屬也于孝惠皇
太后孫也禮不世祭義當擬祧若崇先殿之建則陛下
以子事考廟當世享故世廟配太廟而作崇先殿配奉
先殿而作也義不侔矣聖諭又以三太后梓宮既配葬
于帝主不祔廟世不舉祭議欲遷主陵殿使獲所安是
誠仁至義盡情申禮得足定天下之大典也臣等復考

得宋熙寧罷奉慈廟故事與今日事體畧同但祧義惟
遷主爲是若當時瘞主陵園則襲古人栗主既立乃瘞
桑主之說而誤用之非禮也今日聖諭遷主陵殿歲時
祔享陵祀如故尤爲曲盡非前代所及合候命下本部
另請擇日具儀施行庶廟享之義正而尊祖之道嚴矣
嘉靖十五年七月十七日具題十九日奉旨卿等既
會議云可便擇奉安陵殿吉日擬儀來行

乞請購求古今藏書疏

看得湖廣道監察御史徐九臯奏稱乞將歷代藝文志
書目參對今貯經籍凡有不備者行令中外士民之家
借本送官謄寫原本給還量優賞賚其有志所不載及
近代中外文寮山林碩學記著撰述有裨治理者並令
搜採解送禮部發史館看詳校正藏諸中秘一節臣等
仰惟皇上尊祖敬宗右文重道邇者恭建皇史宬尊藏
累朝寶訓實錄并列聖御製文集四書五經性理等書
及修輯歷代全史誠帝王希代之曠典萬世不刊之事
業也今本官具奏前因具見仰贊聖謨廣敷文教之意

相應在行合候命下移文翰林院查秘閣所貯經籍有
無闕遺不備之書備開書目行本部通行兩京及天下
撫按衙門轉行提學官員用心搜訪凡藝文志所載歷
代遺書及本朝名臣碩儒諸所著述文集凡有補于世
教足成一家之言者一體收採送禮部轉送內閣奏請
藏貯益廣儲書史足彰一代文籍之盛及奏稱欲乞陛
下於便殿省闕章奏處分政事之暇時賜召見講讀侍
從諸臣從容諏訪辯折經指亦是仰承皇上緝熙聖學
延見講臣以備顧問之意伏望皇上俯賜允行均乞聖
裁

嘉靖十五年七月廿七日具題廿九日奉旨書籍充
棟學者不用心亦徒示虛名耳苟能以經書躬行力
踐爲治有餘與夫此心不養以正召見亦虛應也都
罷

奉諭景神殿奉安御容儀節疏

先該本部尙書夏言欽奉聖諭景神殿奉安御容在今
月二十日後三四日間行欽此行該欽天監擇到本年
八月廿四日巳刻吉該本部具題上請奉旨是欽此續
於本月十六日又該本部尙書夏言伏蒙聖諭頒示欽
定奉安御容儀節齋捧到部臣等謹欽遵恭錄呈進候
命下通行內外各該衙門遵奉施行

計開

- 一 內侍監備香亭黃蓋紅杖于通集庫前至日早
奉尊藏使侯勛詣列聖像前跪興平身內執事

舉亭擊執前導御容以次行以原匣抬之由東

華門永泰門景神殿外左門景神門俱中門入

至殿內香亭黃蓋退以次奉御容各尊閣訖奉

尊藏使等入班行叩頭禮畢

一奉尊藏御像使太師侯勛副使 陳鏞 衛鏞

李時 張瓚 顧鼎臣 王廷相 監視使

大宗伯言 導引官 黃宗明 謝丕 金贊

仁 吳祖乾

一是日奉使官俱吉服供事

嘉靖十五年八月十三日具題十五日奉旨是

糾儀疏

儀制清吏司案呈節奉本部送禮科抄出廣東等道試
監察御史彭時濟等題嘉靖十五年七月初九日該臣
等於午門外侍班糾儀本日申時分有晉府高平王府
鎮國將軍竒滋男表槍不知因何緣故手執奏本一封
行至午門左邊下水牌當被守衛虎賁左衛指揮僉事
樊經等收住見在叅照表槍有事自合啓王轉奏不合
擅離藩府越度赴闕奏擾事屬違法合當究問等因奉
旨禮部叅看了來說欽此又該戶科等衙門給事中等
官吳希孟等題爲守衛事奉旨已有旨了該衙門知道

欽此又該午門門正陳清等題爲門禁事奉旨表槍送禮部該衙門知道欽此又該阜城門守門內官監右少監任雄等題爲門禁事又該荅應長隨賀俊等題爲巡街事俱奉旨該衙門知道欽此欽遵通抄送司案查先該午門門正陳清差千戶孫昂送到晉府高平王府輔國將軍表槍到司已經照例送赴會同館安插及行光祿寺支應外查得嘉靖十一年十一月初九日該本部題稱郡王將軍中尉俱以宗室懿親不遵禮法往往越關赴京陳奏合行申嚴戒諭候命下之日移咨都察院通行各該王府地方刊刻板榜常用懸掛禁諭仍行各

該巡按御史備行長史教授啓王知會今後務要嚴加約束各該宗室但有應奏事件照例啓王類奏毋得違訓玩法擅離封域自取卑辱其各該輔導官員亦須遵奉德意以禮訓諭遇事隨即啓王轉奏中間如有故意刁蹬遷延月日不與轉啓者許令家人赴巡按御史處從實具告將輔導官員指名具奏前來以憑本部照例查叅黜退若係重情挈解處治若宗室不行悔改仍蹈故轍者到京之日聽本部叅題情輕者革去爵祿情重者送發高墻奏詞徑自查叅立案等因題奉旨是都依擬行欽此又查得嘉靖十四年二月內該石城王府奉

國將軍多茨赴京奏要預借二十年祿糧等因該本部
查叅覆題奉旨多茨擅自赴京有違祖訓且罰住祿米
二年再犯着撫按官叅送高牆其餘依擬欽此欽遵外
又查得表槍係慶城王府輔國將軍今本內俱改作高
平王府今該前因通查案呈到部叅看得晉府高平王
府輔國將軍表槍縱有應奏激切事情自合具啓晉王
轉奏爲當却又不遵明禁輒離藩守擅詣闕庭肆爲奏
擾况係慶成王府名位今捏作高平王府具奏事屬欺
罔相應從重究治以戒將來及照該日守把阜城門長
安右門承天之門端門侍衛官軍不行盤詰阻當應合

究問再照該府輔導并該日守門人員經過軍衛有司
巡司等衙門各有輔導守把之責通合提問俱候命下
本部移咨法司將守把阜城等門官軍徑自查提問罪
一面移咨都察院轉行巡按山西監察御史將各該輔
導等官及經過軍衛有司等衙門一體查提到官問擬
應得罪名照例發落具由繳報其表槍合咨吏部取差
辦事官一員伴送回府交割仍行山西布政司轉行該
府長史司具啓晉王知會將表槍重加切責以後不許
擅出城郭還照近日石城王府奉國將軍多茨來京奉
欽依罰住俸米二年事例住罰以警將來如再不悛聽

晉王叅奏前來定行從重處治臣等查得累年節該本部議擬題奉欽依申明禁約王府宗室如有驀越赴京奏擾者聽本部叅提情輕者革去爵祿情重者送候高牆事例通行刊刻板榜常用懸掛禁約去後立法不爲不嚴申明不爲不密而近日各該王府將軍夫人等項私自來京奏瀆者殆無虛月是事例愈嚴而違犯愈多况往來道路褻衣小帽無異常人經過有司無從防範一遇到京內而各衙門守衛官軍外而沿途軍衛巡司等衙門通行叅提問罪情屬無辜屢經本部題奉欽依令親王切責不過虛應故事雖奉天語叮嚀一切視爲

泛常以故不遵禮法者恬不知畏日相效尤揆其所自不在處治于旣犯之後而在約束于未犯之先誠欲加約束非責專親王并管理府事者不可也况今宗室日繁每府至有千餘員位而其間違禁玩法者往往係繁多府分人數若不預爲稽察待其出郭日久而後禁之已無及矣伏望皇上勅令各該親王并管理府事郡王將軍許令該府長史教授置立稽考簿籍一扇凡遇五日俱要鎮輔奉國等將軍中尉庶人親自赴府畫押如有稱病不到者即時差官詢問明白若朔望朝謁之期聽親王逐位點闌如有托故私出城郭者即時差人追

忠禮書院
趕拘回本府監禁一面叅奏前來從重處治如有不服
鈐束故爲抗阻者亦聽其具由明白叅奏前來不論情
犯輕重定行革去爵秩或送高墻永爲定例如蒙候命
下行移翰林院通行請勅給發前去欽遵施行其勅書
到日各該親王并管理府事郡王將軍如有不行嚴加
稽察以致宗室驀越潛自赴京者聽本部將輔導等官
叅行吏部徑自罷黜如此庶責有所歸人心警惕不惟
可免赴京奏瀆之擾而一切非法遊蕩所爲亦可杜矣
伏乞聖裁

嘉靖十五年八月十三日具題十五日奉旨依此擬欽

奉慈三后主奉各陵疏

祠祭清吏司案呈嘉靖十五年八月十六日該本部尙
書夏言欽奉聖諭奉慈三后主奉各陵陳后宜先處欽
此欽遵齋捧送部送司查得嘉靖八年二月內該本部
題稱悼靈皇后正位中宮上主宗廟之祀已及七年禮
宜祔享太廟但今太廟內九廟之制已備唐宋故事后
於太廟未有本室則創別廟故禮記喪服小記婦祔於
祖姑祖姑三人則祔於親者今孝惠太皇太后實皇考
獻皇帝之生母則悼靈皇后神主似當祔於奉慈殿孝
惠太皇太后之側等因奉旨是欽此先已欽遵外茲奉

聖諭奉遷三后神主於陵殿則悼靈皇后神主禮宜議
 遷安奉別所呈乞題請施行案呈到部臣等竊照悼靈
 皇后神主先因祔於所親暫奉安於奉慈殿孝惠太皇
 后之側今我皇上更正典禮三后神主今擬遷奉陵殿
 則悼靈皇后神主禮宜遵奉聖諭暫請安於奉先殿旁
 室以妥神靈但臣等竊見奉先殿別無旁室惟斜廊兩
 廡似非奉安元后之地且不足以容鼎俎惟殿之盡西
 一室空虛清闕所宜遷奉惟於歲時享祀或有事祭告
 祖宗列聖則宜一體設饌而但不啓主匱不見祝稱斯
 為合禮再照先皇后謚稱悼靈考之謚法在悼雖協年

中早夭之義而靈義有六類非大美之稱仰惟先皇后
 正位中宮奉主宗祀贊理內治已及七年懿行純德足
 以母儀天下揆之前謚未稱表行之實禮宜更定褒稱
 庶以垂示後世如蒙乞勅翰林院另行撰議上請所有
 遷主冊謚并告廟日期合候命下行欽天監各擇吉期
 本部另行具儀上請伏乞聖裁

嘉靖十五年八月十五日具題十七日奉旨是

嘉慶二十五年八月十五日具疏
本疏具行具謝上請於聖德

設主冊籍共當禮日與合刻命不存越天盟各對吉其
以母謝王不結之前端未蘇妻存之實斷宜更求
五封中宗奉王宗廟贊聖內前日又少平續行條
...

請定廟成樂章疏

祠祭清吏司案呈案查先該本部題稱各廟既已特建
則樂亦誠宜特設所據各廟特享太廟祫享大祫一應
樂章合行翰林院撰述等因奉旨是欽此已經備行翰
林院欽遵撰述去後今照宗廟落成在邇所有寢成安
神樂章呈乞題請施行案呈到部臣等考按古人作廟
皆作樂以歌咏其事詩商頌之殷武周之闕宮是以茲
者宗廟告成禮宜別擬奉安列聖神主樂章以安神靈
以告成功乃應經義乞勅翰林院增撰上請御筆親裁
發下本部轉行太常寺令各該執事官生預行習熟庶

禮部奏

禮部

臨期得以嚴事謹題請旨

嘉靖十五年八月十九日具題廿一日奉旨這安生
樂歌着顧鼎臣撰來朕定

欽奉聖諭疏

祠祭清吏司案呈嘉靖十五年八月十六日該本部尙
書夏言欽奉聖諭大庖厨祗宜作生前飲食不宜作神
位前祭品之所今將文華之小厨更名神厨以辨日二
上食之所且比大庖厨近便欽此欽遵齎捧到部送司
案呈到部臣等爲照大庖厨乃內殿上食烹調品羞之
所別在西內地遠非宜今照文華殿小厨密邇內殿委
便供進及更名神厨當如聖諭舉行尤合神禮合候命
下本部通行內外各該衙門欽遵施行

嘉靖十五年八月十九日具題廿一日奉旨是大庖

禮部奏

卷之二十

二十二

禮部

止辦飲食文華小厨作神厨供内閣上食

慎選貞淑以充妃嬪疏

嘉靖十五年九月初四日欽奉勅禮部比者輔臣建議
慎選貞淑以充妃嬪用廣嗣續麗妃閻氏首誕子祥雖
進妃封未加美號宸妃沈氏安嬪沈氏康嬪杜氏同中
宮以侍朕共勤贊于宗祀茲即九日吉并行進封之賜
宸妃沈氏麗妃閻氏俱進封爲貴妃端嬪曹氏首出淑
祥進封爲端妃安嬪沈氏進封爲安妃康嬪杜氏進封
爲康妃合行事宜併具來聞欽此欽遵臣等先奉聖諭
原選淑女四盧氏封爲靖嬪江氏爲恭嬪任氏爲順嬪
趙氏爲榮嬪取九月九日寅時發冊如昨例行欽此已

林沙奏言

忠禮書院

該本部欽遵具題外今復奉前項勅諭謹將合行禮儀併行開坐上請伏乞聖裁

計開

一 冊封吉期遵照欽定嘉靖十五年九月初九日寅時

一 本月初八日上具常服以進封 貴妃 貴妃

端妃 安妃 康妃祭告奉先殿先期太常

寺備香帛脯醢酒果翰林院撰告文其冊封

靖嬪 恭嬪 順嬪 榮嬪先次已經預併告

訖免行再告

一 先期內府造 貴妃 貴妃 端妃 安妃

康妃 靖嬪 恭嬪 順嬪 榮嬪合用金銀

冊冠服玉圭等件

一 本部奏請行禮正副使十八員

一 前一日鴻臚寺設節冊案于奉天殿節案居左

冊案居右設節冊綵輿于丹墀內教坊司設中

和韶樂及大樂錦衣衛設儀仗如朔望儀

一 是日早內官設 貴妃 貴妃 端妃 安妃

康妃 靖嬪 恭嬪 順嬪 榮嬪受冊位

于各宮中設節冊案于受冊案之北節案居左

冊案居右又設香案于節冊案前設內贊各三人引禮各二人

一至期上具皮弁服御華蓋殿鴻臚寺官奏執事官具朝服禮畢奏請陞殿導駕官導上陞座文武百官各具朝服入班行叩頭禮左右侍班正副使亦具朝服入就拜位鳴贊贊四拜興傳制官跪奏傳制執事官舉節冊案由殿左門出稱有制鳴贊贊跪正副使跪制官稱制曰嘉靖十五年九月初九日進封宸妃沈氏麗妃閻氏俱為貴妃端嬪曹氏為端妃安嬪沈氏為安妃康

嬪杜氏為康妃冊封錦衣衛正千戶盧惠女盧氏為靖嬪江洋女江氏為恭嬪任惠女任氏為順嬪趙汝誠女趙氏為榮嬪命卿等持節行禮贊俯伏興四拜禮畢執事官舉節冊置綵輿中黃蓋遮送至右順門正副使朝北面立內官捧節冊由正門入迎至 貴妃 貴妃 端妃 安妃 康妃 靖嬪 恭嬪 順嬪 榮嬪各 宮中節冊未至之前引禮請 貴妃 貴妃 端妃 安妃 康妃 靖嬪 恭嬪 順嬪 榮嬪各出迎于宮門外節冊至由正門入

貴妃 貴妃 端妃 安妃 康妃 靖嬪

恭嬪 順嬪 榮嬪隨至拜位內官以節冊各

置于案內贊贊四拜宣冊贊跪宣冊女官取冊

立宣于 貴妃 貴妃 端妃 安妃 康妃

靖嬪 恭嬪 順嬪 榮嬪之左訖贊受冊贊

搢圭宣冊女官以冊授 貴妃 貴妃 端妃

安妃 康妃 靖嬪 恭嬪 順嬪 榮嬪

各受冊授女官女官各跪受于 貴妃 貴妃

端妃 安妃 康妃 靖嬪 恭嬪 順嬪

榮嬪之右立于西贊受冊訖贊出圭與四拜禮

畢內官持節由正門出 貴妃 貴妃 端妃

安妃 康妃 靖嬪 恭嬪 順嬪 榮嬪各

送出宮門內官齎節出至右順門外以節授正

副使報禮畢正副使得報持節復命

一謁內殿是日 貴妃 貴妃 端妃 安妃

康妃 靖嬪 恭嬪 順嬪 榮嬪各具服候

皇上率詣奉先殿崇先殿行謁告禮如常儀先

期太常寺備告內殿酒果脯醢翰林院具請撰

告詞

一謝恩是日謁內殿畢 貴妃 貴妃 端妃

安妃 康妃 靖嬪 恭嬪 順嬪 榮嬪各
 具服詣昭聖康惠慈壽皇太后前章聖慈仁皇
 太后前俱行八拜禮畢上服皮弁服皇后亦具
 服各陞座贊引女官引 貴妃 貴妃 端妃
 安妃 康妃 靖嬪 恭嬪 順嬪 榮嬪詣
 前就拜位俱行八拜禮畢還宮

嘉靖十五年九月初四日具題次日奉旨是依這次
 儀行欽此

秋祭七陵奉諭禮儀開坐上請疏

祠祭清吏司案呈奉本部送嘉靖十五年九月十五日
 詔本部尚書言欽奉聖諭秋祭七陵已有諭於十八日
 發京長陵朕躬拜獻陵以大臣勛景陵時裕陵延德茂
 陵言泰陵元康陵鏗陳后陵詔各行禮廿一日寅未卯
 初祭此係春秋正祭用青布服往回在彼仍吉服且定
 廿五日回京十八日申時吉止至沙河從官着次早朝
 後隨至彼亦令次早朝次正祭免朝文武官王瑾等居
 守欽此欽遵齋捧送司案呈到部臣等謹將合行事宜
 遵照先次聖駕詣陵禮儀及今奉聖諭參酌議擬開坐

上請伏乞聖裁候命下本部通行告示內外衙門欽遵施行

嘉靖十五年九月十五日具題本日奉旨是照儀行計開

一太常寺備辦祭告內殿祭品翰林院撰祝文

一前期一日上奉皇太后率后妃告內殿畢各還宮

一十八日上御奉天門視朝欽天監官奏祭祀期畢還宮乘輿既駕臨煇上奉皇太后陞輦上駕前導后妃輦轎後隨由長安左門出

一扈從官便衣前行文武百官俱吉服先趨德勝門外候聖駕過退

一錦衣衛設丹陛儀衛扈行

一扈從官遵照先今欽奉聖諭五府九卿各堂官

一司屬各一太常鴻臚留京堂一屬一日講官

六科六人十三道十三人除別有酌擬另行具

聞

一扈從官往回在途供事以便衣

一工部差官巡視橋梁道路遇有損塌隨宜修理

一居守文武大臣已奉有簡命照例請勅行事

一直守皇城四門京城九門分調提督武臣及點
聞科道官兵部坐名奏請

一關給扈從官軍行糧戶部俱照例舉行

一光祿寺隨處預備御膳酒飯供具

一是日駕至沙河昌平州官吏師生耆老人等俱
跪迎道旁駕過退上奉皇太后降輦入行宮本

日免朝

一十九日早文武從官詣行宮早朝各衙門奏事
如常儀朝罷百官先行上奉皇太后啓行后妃
後從至天壽山紅門上奉皇太后降輦入左門

皇太后陞輿上駕前導至行宮駐蹕免朝

一二十日文武從官吉服朝參各衙門奏事如常
儀

一二十一日免朝以寅末卯初上具青袍躬詣長
陵致祭如儀獻陵景陵裕陵茂陵泰陵康陵陳
后陵遣官七員遵照欽命各具青布服詣陵行
禮

一扈從官員俱青布服恭詣長陵陪祀

一二十二日早朝奏事如常儀

一二十三日早朝奏事如常儀遣官復命

一二十四日免朝從官先行駕發至沙河行宮從官行叩頭禮

一二十五日朝參奏事畢駕還京文武百官軍民耆老人等俱出迎于德勝門外居守文武大臣復謁駕前致詞行叩頭禮教坊司大樂鼓吹振作駕入皇太后以下各還宮上告內殿如儀

奉議三后神主名實更正疏

先該本部尙書夏言欽奉聖諭議遷三后神主該本部等衙門會議得孝宗皇帝於奉先殿側特建奉慈殿別祭孝穆皇太后復祔孝肅太皇太后近祔孝惠太皇太后蓋因主不祔廟世不舉祭茲奉聖諭遷主于陵殿庶獲所安等因題奉旨卿等既會議云可使擇奉安陵殿吉日擬儀來行欽此續于本年九月二十一日又該本部尙書夏言於沙河行宮面奉聖諭三后神主皆係當時尊上皇太后太皇太后之號乃因子孫所奉尊稱今既奉遷陵殿實同帝后之例揆之名實于禮未宜似當

更正卿其會同翰林院禮科詳議具聞欽此欽遵臣等
于本年九月廿八日會同大學士李時尙書兼翰林院
學士顧鼎臣等并禮科都給事中李充濁等於東閣集
議謹按禮天子惟一帝一后配享于廟禮之正也茲三
后神主禮不祔廟義當從祧已經聖明定制奉遷陵殿
深合典禮但仍稱皇太后太皇太后之號揆之名義實
有未安蓋三后稱皇太后太皇太后于奉慈殿乃子上
尊號于母孫上尊號于祖母禮也若今日孝肅太皇太
后奉遷於裕陵實在英宗睿皇帝孝莊睿皇后之側孝
穆皇太后孝惠太皇太后奉遷於茂陵實在憲宗純皇

帝孝貞純皇后之側則三后神主之奉安二陵當各從
夫婦之義而不當仍襲子孫之稱故皇太后太皇太后
三號在奉慈殿則可在陵殿則不可也臣等會同諸臣
集議僉同據禮所當改題合無請以孝肅太皇太后神
主題稱孝肅貞順康懿光烈輔天成聖皇后不用睿字
孝穆皇太后神主止稱孝穆慈惠恭恪莊僖崇天承聖
皇后孝惠太皇太后神主止稱孝惠康肅溫仁懿順協
天佑聖皇后俱不用純字則嫡庶之稱可別夫婦之分
無嫌而尊尊親親之道並隆而無失矣所有改題神主
并奉遷一應禮儀恭候命下本部另行擇日議擬題請

施行

嘉靖十五年九月廿七日具題三十日奉旨卿等既會議僉可依擬行

叅劾定西侯蔣傳奏討蟒衣疏

主客清吏司案呈奉本部送禮科抄出禮科都給事中李充濁等題稱臣等于本月十七日接受到定西侯蔣傳一本為乞恩比例請給蟒衣以壯國威等事內開比例照靈璧侯湯佑賢例穿用伊祖父原遺蟒衣臣聞書曰惟衣裳在笥詩曰彼其之子不稱其服蓋衣所以命有德而酬有功也伊祖父以功德得者而子孫冒濫之於國為在笥之慎於彼受不稱之耻臣等即查得弘治十三年二月內該禮部議得今後公侯伯及文武大臣并各處鎮守守備等項將官若果有勲勞德望宜加異恩

者出自聖裁外其餘不許一槩比例奏討蟒衣飛魚等項衣服如有故違禁約夤緣陳請者許該科叅駁六科十三道糾劾該部執奏治以重罪等因奉孝宗皇帝聖旨是賞賜蟒衣係朝廷特恩近來一槩比例奏討好生煩瀆今後再有這等妄討的必罪不饒欽此臣等又查得嘉靖十三年十一月初四日定國公徐延德一本圍宿事奉陛下明旨蟒衣給賜係出特恩如何輒自請討不準該部知道欽此臣等以爲先後聖裁不謀而同蓋重蟒衣之賜勸功德之最者也今蔣傅一等未展寸功無聞巧爲比請妄自希求佑賢稱祖遺以遂僥倖之計

進呈祀冊疏

該本部尙書夏言欽奉聖諭欽遵議擬每年八月二十日先行欽天監選定明年大報等祀日期具印信手本送部本部尙書具本封請御覽過發本部另具進呈祀冊日期欽遵御定儀制題請聖旨於九月朔日進呈次日本部即行與太常寺欽遵每祭先期如舊規奉請該寺常年總奏祭祀之禮宜從罷免所有原奉御定儀謹用開坐統乞御覽裁正合候命下本部通行內外各該衙門欽遵施行永著爲令

計開

恭奉御筆一道御定儀永為遵守

一每歲九月朔大宗伯以大報日期等日告于皇

帝前期于本衙門宿鴻臚寺卿具請御殿及設

案奉天殿中

一是日百官公服侍班皇帝服皮弁大宗伯具朝

服自午門中道行捧祀冊日立置于案皇帝就

案先立定大宗伯跪奏曰嘉靖幾年分大報等

祀日冊請敬之皇帝搢圭取而恭視訖序班舉

案置于華蓋殿中皇帝陞座百官叩頭如常禮

嘉靖十五年九月廿九日題十月初一日奉旨是

蔣傳援佑賢以為僭越之圖如此蠅營蓋無止極則朝廷命德酬功之具為各官乞恩比例之私是使賞之不足勸而得之不為榮矣伏乞勅下勳舊務遵明旨當各修職業以俟欽給勿妄為奏請以干憲典焉等因題奉旨禮部看了來說欽此查得先奉本部送禮科抄出管理紅盔將軍定西侯蔣傳奏為乞恩比例請給蟒衣以壯國威等事臣本凡庸荷蒙天恩命臣管理紅盔將軍直宿臣夙夜驚惕罔敢怠忽者臣恭遇皇上謁陵該臣率領頭班紅盔將軍隨侍照得管領紅盔將軍靈璧侯湯佑賢先因隨駕赴陵奏蒙聖恩准與蟒衣視甲騎坐

馬匹臣與本官事體相同伏望聖慈憐憫一視同仁照例在臣穿用祖父原遺蟒衣以壯國威容臣騎坐馬匹以便奔趨不勝感戴天恩之至等因奏奉聖旨該衙門知道欽此欽遵通抄到部送司案呈到部看得禮科都給事中李充濁題稱定西侯蔣傅不遵明旨僭討蟒衣以濫希特恩乞加禁約一節查得祖宗舊制凡公侯駙馬伯俱用麒麟白澤服色若文武大臣果有勲勞懋著德望在人者間蒙特恩給賜蟒衣飛魚等服穿用蓋賜之異服以彰殊勲非可以比例陳乞誠有如該科所論者近來勲舊大臣多有比例奏討若非奉有特恩在給

本部俱不敢擬請邇者恭遇皇上躬謁陵寢係敦修累朝曠典文武大臣俱蒙特恩賞賜蟒衣飛魚等服該靈璧侯湯佑賢管領紅盔將軍扈駕隨侍因具奏乞恩穿用祖遺蟒衣以壯國威比之尋常無故陳乞者不同以故本部特與題覆應否在給取自上裁已蒙特恩准與外今者恭遇皇上躬修陵祭又該定西侯蔣傅管領紅盔將軍扈駕比與靈璧侯湯佑賢事體相同以故本官具奏陳乞穿用祖遺蟒衣事亦有因但今大駕已回本部難與擬請况既經該科論奏前因及查有本部先年題在事例相應再行申明禁約合無今後公侯駙馬伯

及文武大臣并各處鎮守守備等項將官若果有勲勞
德望宜加異恩者出自聖裁外其餘不許一槩比例奏
討蟒衣飛魚等項衣服如有故違禁約黃緣陳請者許
該科叅駁六科十三道官糾劾該科執奏其不由陳乞
出自特恩者不在此例庶禁例嚴明恩典爲不濫矣

嘉靖十五年十月初三日具題初五日奉旨是欽此

大慶疏

嘉靖十五年十月初六日該司禮監太監張佐傳奉聖
旨嘉靖十五年十月初六日朕第二子生禮部知道欽
此欽遵恭捧到部臣等仰惟皇上峻德承天大孝光祖
帝心眷佑宗廟垂庥大慶滋至迺者陽月吉辰篤生元
嗣國本天宗永有承賴實宗社萬萬世無疆之慶也中
外臣民不勝懽欣忭躍之至臣等謹將欽奉聖諭合行
禮儀開坐上請伏候命下欽遵施行

計開

一本月初九日卯時皇上親詣南郊以誕生第二

子奏告昊天上帝午時祭告奉先殿崇先殿行事俱祭服

一奉欽命方澤遣太師勛朝日輔臣時月夕伯鐔太社稷少傅言帝社稷尙書鼎臣天神伯鐔地祇駙馬景和俱卯時行禮

一內殿捧主官遵照欽定太宗勛仁宗時宣宗言英宗景和憲宗鐔孝宗鼎臣武宗棟

一祭品欽奉聖諭南北郊加一牛通用酒果脯醢三獻太常寺先期預備翰林院撰告文

一南郊文職五品以上武職四品以上官照例具

服陪拜

一內殿文武三品以上武臣公侯伯皇親駙馬俱入陪拜

一初十日早皇上具冕服御奉天殿鴻臚寺致詞文武百官各具朝服稱賀先後行四拜禮

一自本月初七日始至十五日止百官朝參辦事俱吉服

一本部行令欽天監擇日題請詔告天下

一遣官齋捧御書前往各王府報知例該差官十

一員分投前去合於翰林院左右春坊六科行

取應差官二十二員疏名上請點用

嘉靖十五年十月初七日具題本日奉旨是都照擬
行稱賀只在門吉服如前例欽此

大慶疏

茲者恭惟皇上誕生皇嗣昨該本部謹將一應禮儀開
坐題請欽奉旨是都照擬行稱賀只在門吉服如前例
欽此臣等仰惟聖嗣挺生海宇均慶天地祖考誕降福
祥宗社生靈永有依賴但皇子初生於典甚重考之前
代簡畧無聞我皇上告聞郊廟百神而後詔示天下禮
也惟是羣臣懽慶之情以為天地垂庥祖考錫羨篤生
聖子實我皇上至德大孝所致而臣民咸預其福故恭
請皇上服冕御殿受賀亦所以欽天命重元嗣示不敢
輕亦禮也伏望皇上俯垂臣等末議於初十日早皇上

仍服袞冕御奉天殿文武百官各具朝服致詞稱賀庶
慶禮大備足垂一代盛典而皇上尊天敬祖之意無弗
稱矣臣等不勝惓惓祈請之至

嘉靖十五年十月初七日具題本日奉旨覽卿等所
謂朕敢不欽承天眷但服冕御殿自有日也可如前
旨行欽此

奉諭地震加修省免大慶疏

嘉靖十五年十月初十日該本部尚書夏言欽奉聖諭
朕懼上天宜即加修省自今日始青衣黑帶靜處三日
露告于天賀喜其罷之卿部中即示羣臣知朕意欽此
除欽遵遍示文武羣臣痛加修省外臣等仰惟皇上至
德謙摛偶因地震之異恐懼修省乃于大慶之禮亦令
罷免仰見皇上畏天之誠雖禹湯之心不是過矣但聖
嗣誕生天下大本所係中外羣工以及海宇臣民無不
歡忻鼓舞仰戴皇天降佑之祥茲遠以稱賀罷免不惟
不足以伸臣子慶幸之私其於所以重國本答天眷亦

若有未盡者伏望皇上俯察羣心曲從愚懇合無仍於
修省之後本月十三日御門容令文武百官各具吉服
照舊致詞稱賀庶仰荅天戒丕承天休並行而不失矣
嘉靖十五年十月十一日具題本日奉旨卿等既這
等說依擬行欽此

奉議遷三后神主奉安陵殿擬儀疏

祠祭清吏司案呈先該本部尚書夏言欽奉聖諭議遷
三后神主奉安陵殿隨該本部等衙門會官集議等因
題奉旨卿等既會議云可便擇奉安陵殿吉日擬儀來
行欽此續于本年九月廿一日又該本部尚書夏言面
奉聖諭三后神主皆係當時尊上皇太后太皇太后之
號乃因子孫所奉尊稱今既奉遷陵殿於禮未宜似當
更正卿其會同翰林院禮科詳議具聞欽此欽遵臣等
會議得孝肅太皇太后奉遷於裕陵孝穆皇太后孝惠
太皇太后奉遷於茂陵當各從夫婦之義而不當仍襲

子孫之稱據禮所當改題合無請以孝肅太皇太后神
主題稱孝肅貞順康懿光烈輔天成聖皇后不用睿字
孝穆皇太后神主止稱孝穆慈慧恭恪莊僖崇天承聖
皇后孝惠太皇太后神主止稱孝惠康肅溫仁懿順協
天佑聖皇后俱不用純字等因奉旨卿等既會議僉可
依擬行欽此欽遵行在欽天監手本擇到後開各該大
吉日時前來案呈到部臣等謹將改題神主并奉遷一
應禮儀恭擬開坐上請聖裁所有合用題主官一員護
主官二員行祭告安神禮官二員伏乞簡命俱候命下
本部通行內外衙門欽遵施行

計開

一 欽天監擇到改題三后神主以本年十月十六
日巳時告奉遷以本月十七日辰時奉安以本
月酉時

一 翰林院撰告內殿奉遷祝文并陵殿奉安祝文
一 太常寺備辦各該祭品如常儀
一 十六日早內監官請捧三后神主洗滌重加粉
飾中書官書寫欽命大臣一員改題題畢仍前
暫奉安于神座至期上行請奉遷禮

一 欽命大臣二員先期詣裕陵茂陵行祭告禮至

日行安神禮

一欽遣皇親駙馬大臣二員護送神主至二陵
 一先期內侍官設神主輿冊寶衣冠亭香亭各
 于奉先門外仍于裕陵茂陵殿內會同二陵神
 宮監官各陳設合用神座几案冊寶衣冠等案
 一錦衣衛備傘扇儀衛
 一 是日早免朝上具常服詣奉慈殿門外太常官
 導上由殿左門入內贊奏就位上就拜位奏上
 香上三上香奏獻禮上行三獻禮贊讀祝讀祝
 官讀訖奏四拜上四拜平身奏禮畢女官導皇

太后以下行禮畢上命司禮監官三員請捧孝
 肅皇后神主孝穆皇后神主孝惠皇后神主至
 奉先門外各置于輿捧冊寶衣冠各置于亭香
 亭神主輿前行冊寶衣冠亭各以次後隨內侍
 擎蓋仗引上陞轎隨行由後左門中左門奉天
 門午門內上降轎橋北立目送三后神主輿行
 門闔上陞轎還宮神主輿由中門出至午門錦
 衣衛儀衛前導由端門承天門長安左門俱中
 門出由德勝門詣陵

一百官青衣本等帶先詣德勝關外候神主輿至

入班行五拜三叩頭禮神主輿行過退

一神主輿至紅門外內侍官各詣三后神主輿前
 跪詣捧神主出輿由左門入復陞輿至陵所孝
 肅皇后神主詣裕陵孝穆皇后神主孝惠皇后
 神主詣茂陵俱由中門入至享殿門外內侍官
 各捧入享殿以孝肅皇后神主奉安于英宗睿
 皇帝神寢之左室孝穆皇后神主奉安于憲宗
 純皇帝神寢之左室孝惠皇后神主奉安于右
 室冊寶衣冠俱各奉安于室訖欽遣官行安神
 禮禮畢回京復命

嘉靖十五年十月十一日具題十三日奉旨題主着
 尚書顧鼎臣侍郎謝不護行駙馬崔元鄔景和遣祭
 伯衛錚陳鏞各行禮餘依儀行

十欲報其親非但取諸尊崇是身不能顯其親雖崇而
 過之不足云也先議以皇考廟比世室之義而即名世
 廟朕今反復思之今推尊太宗世宗不遷是矣恐皇考
 亦欲尊讓太宗者今台有議且世之一字來者或用加

自滿朝刺驗各下斷絕於對行皇太后神主奉安于宗廟
 尚書臚鼎曰寺項橋下蕭公懋謙審元鳴景味豈然
 嘉靖十五年五月十一日具殿十三日奉旨獻王善

奉勅更正皇考廟名疏

嘉靖十五年九月廿八日欽奉聖諭朕思得皇考之廟
 名似不甚穩卿其亦思之否其言之續奉聖諭朕聞人
 子欲報其親非但取諸尊崇是身不能顯其親雖崇而
 過之不足云也先議以皇考廟比世室之義而即名世
 廟朕今反復思之今推尊太宗世祭不遷是矣恐皇考
 亦欲尊讓太宗者今合有議且世之一字來者或用加
 宗號將思何避乎今加於皇考廟徒擁虛名又不得世
 宗之稱不如別擬恐亦不可同諸太宗世祭者此非朕
 貶親後亦有議或俟之後亦可卿等朕重託之者宜悉

心言之卽夕卿可會勛時共詳議來除已會同太師武定侯郭勛大學士李時議奏外續又奉聖諭皇考廟名卿即會二臣看詳如題曰獻皇帝廟庶別宗稱以見推尊之意欽此欽遵臣仰惟皇上先後賜諭大義明盡真聖神之見度越千古顯揚之孝迥出常情及伏覩欽定廟名深合典禮萬世莫易臣忝禮官之長恭承休命誠不可不考據古昔恢張德意以俟後世臣是以感激冒昧上議以聞臣謹按禮天子諸侯始祖廟稱太廟太宮子孫世祀無容易矣若昭穆等宮則稱小廟小寢世盡遞遷類稱毀焉唯其間有功德祖宗雖世數當祀則必

別立廟以世祀之以其既不可以昭穆名又不可以太始目乃以義起號之曰世若周之文世室武世室是也然此亦惟周時始有此制前乎此若商之三宗夏之啓少康雖有其廟未有其名也降自炎漢惟孝武帝嘗招賢俊興制度改正朔易服色建二郊表六經攘口粵興禮樂其功至著然以前有孝文宗無二大故推尊爲世宗至光武皇帝誅王莽平赤眉都洛邑復漢室其功同於創業以上有高祖不可稱太故推尊爲世祖他如唐之文皇宋之太宗則上無所避故皆以太稱宗不言世矣此皆以功德百世不遷與始祖並饗於無窮不可限

以定數也由是論之則太即世世即太如太有所避即當稱世其義一也稱世之義蓋如此以我朝列祖言之太祖則即帝者之始祖謂之太廟固無疑矣自餘列聖廟號昭穆自當以世遞遷惟我太宗文皇帝汎掃沙漠建極北都再振文治重奠海宇功符太祖今當世盡故特立廟於昭穆之外謂之太宗廟百世祀之不遷其義正矣自仁宗以下皆繼體守文之主固羣廟也使後世有功德如太宗或又有過之者必又將從而宗之則既不可名太其義必當稱世如漢世宗世祖之故事矣是非有意于厚薄之也功德所在自有公論子孫莫得而

私之也惟我皇考獻皇帝雖未登極爲天子然功業丕著迹其聖德隆盛默受天眷篤生聖人膺歷繼天興復古治分建四郊創立九廟制禮作樂立法定制登三咸五以幸斯世巍乎成功煥乎文章如我皇上功德之盛真足以媲美二帝三王則夫我獻皇帝蓋不必親自爲之而後爲盛者矣程頤所謂物豈無本今日天下皆出此人安得謂無功業正我皇考之謂歟雖比迹殷之祖契周之配稷亦奚不可况於一世號乎惟是上有文皇既稱太宗義當尊讓後有聖帝必爲聖宗理應虛竢則是宗世二稱我皇考在天之靈必不欲當况世之上不

冠以謚世之下不承以宗而單題一字考之前古亦未經見胡可爲訓且泛而不切華而不實揆之經義皆所未安誠有如聖諭者今欽定爲獻皇帝廟則不爲廟以謚名合乎周典而尊稱昭揭與列聖廟號同符直使六世昭穆不疑於受厭而皇考推尊太祖太宗之心亦得以少安聖諭所謂徒擁虛名後亦有議庶幾免矣於此不惟仰見陛下體親之孝又以見陛下大公無我之心顯親行道胥得之矣况我皇考既有世實宜享世祀他日當遷之期後世子孫如有宋神宗臣子如有程頤朱熹則不必今日預以世名而禮以義起必有以申我皇

上世世享祀之情者矣臣請以世廟宜如欽定更稱爲獻皇帝廟庶義明禮正而萬世之公議始定伏乞勅下有司恭製扁額擇日奉懸仍乞勅下臣議宣付史官俾告來世

嘉靖十五年十月十三日具題十五日奉旨卿所議足見忠敬朕皇考廟名著更正稱獻皇帝廟即行製扁擇日奉懸所議付史館該衙門知道

禮部奏議

禮部書院

（Faint vertical text columns, likely bleed-through from the reverse side of the page. The text is mostly illegible due to fading and ghosting.)

欽奉聖諭疏

祠祭清吏司案呈先該本部尚書夏言面奉聖諭陵殿神御儀物既已告過興工便當移撤欽此案查先經本部欽奉聖諭七陵多有損壞當併工修飾欽此已於本年四月十七日卯時祭告興工外案呈到部臣等看得七陵享殿既今興作見新所據神御儀物合無令該監官暫行移撤廊廡閒空去處俟修理完日仍前奉安殿內所有歲時遣官祭祀即暫於明樓前對陵行禮不必陳設神座再照各陵殿神御及諸供祭器物年久亦多損壞又先後成造規制不一今陵殿修飾更新前項儀

禮部奏議

卷之二十

四十八

禮部書院

器似應一體更製及照裕茂二陵享殿合令所司先行
裝修三室完備以妥安三后神主其餘工程與諸陵一
同經理合候命下通行內外衙門欽遵施行

嘉靖十五年十月二十日具題廿二日奉旨依擬

欽奉聖諭疏

祠祭清吏司案呈嘉靖十五年九月初六日該本部尚
書夏言欽奉聖諭太常讀祝贊禮官閑時再選四箇補
用欽此茲者恭遇宗廟落成奉安神主在近各廟祭宜
用堂上官一員司祝庶稱皇上孝享崇敬至意昨該本
部行令太常寺開送典簿協律郎贊禮郎等官曹大宣
等前來案呈到部臣等謹欽遵聖諭考選得典簿等官
曹大宣等四員俱各聲音洪亮通曉禮儀堪以補用謹
開坐上請伏乞欽定職銜候命下本部移咨吏部銓選
施行

計開

考選過典簿一員 曹大宣

協律郎二員 馬良德 曹守清

贊禮郎一員 李應春

嘉靖十五年十月廿三日具題廿五日奉旨是曹大宣等都着做本寺寺丞

桂洲奏議卷第二十一

桂洲奏議第二十一卷

何

南宮集之十二目錄

奉諭頒詔朝鮮安南覆查勘安南事疏

會兵部議征安南國疏

獻末議請明詔以推恩臣民用全典禮疏

奉聖諭各陵碑亭諸妃墳所立石如式疏

奉聖諭皇嫂孝靜皇后加十二字全謚疏

宗廟告成恭請瞻視以伸聖孝疏

宗廟告成奉安神主禮儀疏

奉欽諭兩宮徽號議擬疏

皇嗣誕生大慶合行儀注疏

請補六科都給事中陪祀宗廟疏

宗廟告成請加上兩宮徽號字數疏

宗廟告成請上兩宮徽號合行禮儀疏

奉聖諭皇后助奠儀注疏

大禮告成請慶賀儀注疏

奉議內殿神主奉安景神殿禮儀疏

奉旨定太廟祫祭禮儀疏

宗廟告成上兩宮徽號慶賀行禮儀注疏

議定王府宗廟武臣家廟疏

宗廟新成肇稱殷祀一應禮儀更正疏

以上十五年十二月以前稿

桂洲夏文愍公奏議

忠禮書院

桂洲夏文愍公奏議第二十一卷

何

門人

涇縣左

鎰

編輯

宣城貢汝成

華亭徐

階

武進

薛應旂

校正

裔孫

之瑞
之琳

重訂其

灑
洛
澗

全校字

南宮集卷之十二

禮部題

奉諭頒詔朝鮮安南覆查勘安南事疏

儀制清吏司案呈奉本部送禮科抄出本部尙書夏言
題嘉靖十五年十月初六日恭遇皇嗣誕生例該詔告
天下本部已經題奉欽依着十一月初六日彌月之期

桂洲奏議

卷之二十一

一

忠禮書院

舉行欽此除欽遵外今月二十六日臣言伏蒙皇上面諭皇子初生既詔告天下何獨外國至冊封日始遣使詔諭况已告聞天地百神便當使華夷一體知悉他日冊立再行詔告卿宜議擬舉行臣即榻前頓首具對誠宜欽奉聖諭仰惟元嗣誕生宗社大慶歡欣屬望夷夏同心今海內外國一體詔諭誠仰見聖人無我王者無外帝王一視同仁之心甚盛典也所據來月初六日頒降告皇子生詔書合無依冊立皇太子例遣翰林院官一員充正使給事中一員充副使齎捧詔書往諭朝鮮安南二國知悉俟冊立皇太子之日再行遣使詔諭合

候命下本部欽遵舉行仍著爲彙典以成一代之制庶神人交欣而華夷胥慶矣等因奉旨是著爲令禮部知道欽此欽遵抄出送司查得嘉靖二年四月內該翰林院編修孫承恩題奉開讀事照得臣節該禮部題奉欽依差臣與同禮科右給事中俞敦齋捧詔書綵段諭賚安南國王黎暲欽遵前往沿途傳聞該國近年以來臣下作亂黎王遇害目今國無定主道路梗阻恐難前進等語臣等惟恐不的未敢率易具題馳驛直抵廣西龍州與該國境界相離止八十里節經牌行龍州等處着落體訪黎暲存沒并世子名諱及行附近邊界該國諒

山文淵長慶等府衛令其迎迓續據長慶府申稱本國
見被逆臣陳暘子陳昇據諒山等府地方道路梗阻待
轉報國王迎請如儀復據龍州申稱據守隘頭目丁源
呈內開訪得安南國黎暘已沒世七年今世子改號光
紹但不知名諱及訪得該國鎮朔衛土官閉孝忠稱說
光紹被逆臣莫登庸作亂趕逐海濱存沒未卜又有逆
臣陳暘霸占諒山府等處號稱天應後故有子陳昇仍
舊占據迄今仇殺未息道路不通等因臣等猶恐不的
又牌仰督備龍州等處指揮楊鈺體訪隨據呈報相同
臣等據此方信前者道路傳聞之言不妄隨又查得先

該去任提督兩廣軍務右都御史蕭狷等會題爲急緊
邊情重務事內開該國咨稱頻歲有亂離之禍大畧與
臣等今次訪報事情相脗臣等竊惟原領詔勅綵段止
該諭資黎暘今黎暘既沒其子稱光紹者承襲初未請
封遭亂又無求援未審是否黎暘嫡派支裔縱使道路
無阻臣等可得而入決亦不敢輕與况據各訪報前來
則是該國逆臣陳氏父子相繼梗於其外莫氏又偏於
其中兵火相仍國無定主臣等又安敢輕入自速辱命
之愆且臣等原移文該國諒山文淵長慶等府衛其諒
山文淵竟無一字回報止據長慶府前項回稱待轉報

木沙奏議
忠禮書院
國王迎請如儀臣等久候邊境亦無迎請信息據勢揆情即使光紹尚存得知天恩俯及亟欲迎請顧其威令久不行於諒山等處失其出入咽喉之路其迎請之使必不能通彼之迎請既不能通臣等亦安得而入哉况前項申報光紹被逐海濱存沒未卜臣等在彼再候亦無益矣禍福利害在臣等固不足惜顧事關國體豈敢不慎臣等思無可進之理于嘉靖元年十二月十一日還至廣西梧州府擬會本題請聞給事中俞敦因感冒瘴氣染病服藥調治不愈竟於嘉靖二年正月初四日身故臣伏思之臣原與給事中俞敦欽承上命充正副

使差往安南國公幹今該國地方多事既不可進而俞敦近故臣又難以獨行理合併行具題如蒙乞勅禮兵二部從長議處使臣有所憑藉遵依以爲進止等因奉旨該部看了來說欽此欽遵隨又該欽差總督兩廣軍務都御史張嶺總兵官朱麟廣西巡按張鉞各題同前事俱奉旨該部知道欽此欽遵該本部看得兩廣鎮巡等官議奏安南國王黎暲沒世已經七年被莫陳二姓逆臣互相仇殺國土分裂未有定主勢難前進合無行令編修孫承恩右給事中俞敦暫且回京容臣等探聽安南國事定差人具奏另爲舉行續該編修孫承恩題

稱原與右給事中俞敦欽承上命差往安南國公幹今該國地方多事既不可進而俞敦近故又難獨行乞勅禮兵二部從長議處使臣有所憑藉遵依以爲進止該本部覆題稱我朝列聖以來凡登極之年差官齎捧詔勅綵段諭賚安南等國使知華夷有主斯禮之不可廢者皇上卽位已該臣等具題欽遣各官前去安南國諭賚去訖今兩廣鎮巡等官題稱安南國王黎暲沒世七年見被莫陳二姓仇殺道路阻塞編修孫承恩右給事中俞敦不惟路梗勢難前進且干綸命法難妄授欲乞從長計議行令各官暫且回京又該編修孫承恩題稱

右給事中俞敦病故難以獨行欲乞從長計處以爲進止叅照鎮巡等官及編修孫承恩題稱前項緣由相應議處但事在彼中遽難遙度合無候命下本部移文彼處鎮巡等官再行查勘如果該國地方未寧委難前進國王黎暲委果已没法難妄授行令編修孫承恩齎捧原領詔勅暫且回京綵段照數驗看明白轉發廣西布政司收貯待事寧之日奏來本部另行具題仍差本官往彼諭賚以終其事惟復另差給事中一員前去會同編修孫承恩探聽彼國寧息前去諭賚臣等未敢擅擬伏乞聖裁等因奉旨是這所奏事情還着鎮巡官查勘

明白孫承恩暫着回京欽此已經備行彼處鎮巡等官
欽遵查勘去後又查得嘉靖三年十二月內該本部題
爲緊急逸情重務事准兵部咨該廣西巡按汪淵等題
稱會同總督兩廣軍務都御史張嶺總兵官撫寧侯朱
麒議照安南國兩廣接境雖云裔夷小邦久被聖明清
化請封納貢守爲常職詔諭賞賚著爲令典茲其國中
擾亂始將十年遂致國土分裂迄無定主臣等歷查經
年案卷博采訪探人言叅度事情似得梗槩倡亂於陳
嵩等之叛逆黎暉遇害繼亂於莫登庸之姦雄黎諱播
遷今據該國長慶府牒文則云姦人杜溫潤等陰聽逆

臣鄭綏等狡計脅遷黎諱于本國清都府源頭本國頭
目黎垺莫登庸等以一方人民無有統攝共推黎諱弟
黎應權攝國事謹守欽賜印信候差陪臣赴京奏事求
封并歲貢其黎應的是先國王黎利之曾孫故國王黎
暉長兄黎灝之子黎諱之弟委係舊王黎暉嫡派宗裔
莫登庸乃本國頭目能爲國討賊始終一節的是忠義
之臣等因又據該國高平府牒文則云本國猶是逆臣
陳嵩子昇竄在諒山地方再有逆臣莫登庸阮時雍等
謀作不軌竊據衝要以致道路梗阻未能徑達嘉靖二
年正月十六日本府具啓前事始通本國世子黎諱處

及一國之人咸仰天朝新政惠及遠人不勝感戴又云世子前被逆庸等輩敢行僭亂暫出居于本國先國王鄉今方命將出師討平逆賊指日恢復差陪臣奏事求封及遞年歲貢如例等因又據廣西龍州申稱安南國王黎暲故絕無子有兄黎灝子黎諲黎應衆臣共推黎諲權管國事諲伊母嫁與莫登庸爲妻欲奪國事被臣杜溫潤鄭綏誘遷黎諲回清都府莫登庸亦誘黎應出海東府把截要路各亂仇殺至今無主等因竊詳該國二府所牒并龍州所申各情互異但以理推之陳暲父子叛逆情罪灼然無待訪勘其黎暲遇害無子國人共

立其故長兄黎灝之子黎諲以爲世子名位甚正權攝國事經六七年臣主定分亦已甚久夫何一日被人脅遷于外國人皆不知之其莫登庸既稱忠義力能討賊何故視主蒙塵竟不迎復乃輒改謀易議別立其弟黎應權攝國事其間篡逼何怪羣疑况傳聞之言或云黎應年齡尙幼豈能權攝國事或云黎應雖稱黎諲同母之弟但黎灝沒世已久焉得尙有幼子或者莫登庸旣娶其母而後生子冒姓黎應亦未可知此雖曖昧夷情未易遙度真僞即使黎應真黎灝之子黎諲之弟則弟豈可以奪兄黎諲乃一國共主而莫登庸輒敢易之則

臣豈可以廢主今該國長慶府牒稱黎應要差陪臣奏
事請封高平府牒稱黎諲要差陪臣奏事請封近據廣
西太平府申據憑祥州牒呈准安南國帖文差陪臣阮
文泰范敦禮鄭麁等齎捧表箋文奏啓本并方物要行
赴京煩爲照例開關放入及應付脚力廩給等因臣等
會訪得該國擾亂未有定主乃輒朦朧差陪臣進貢求
封中間又不明白開說所封何人姓名顯是立非相應
國人不服或是姦雄謀篡假立詭名必有境內姦細通
誘外夷欲假我天朝恩寵以服衆心以遂逆謀亦未可
知所據該國地方其長慶府與廣西憑祥州接境海東

府與廣東欽州接境即今乃莫登庸黎應所據之地於
中國道里切近而文移易達其清都高平等府即今乃
黎諲避居之地其入中國必經長慶海東等處壤地既
隔道路復梗而文移難通論順逆之理則黎諲爲正規
搏噬之勢則莫登庸黎應爲強方鷓蚌之相持而雌雄
之未決今茲黎諲黎應不候本國平定輒遣陪臣請封
於法固當禁阻戒備其或莫登庸伏誅黎諲光復舊物
差遣陪臣請封則名正言順人心允服臣等當亟訪勘
得實具奏定奪萬一黎諲倘致他虞別無嫡裔黎應具
其姓名差遣陪臣請封從之則遂其姦謀不從則別無

應立叅酌定議有非臣下所敢擅專蓋朝廷爲萬邦之極不可不正綱常之大義而自古帝王之御□□亦或以不治治之緣事關邊計臣等不得不預爲之慮也且自古外夷爲患彼初豈敢輕測我中國之虛實淺深哉必有我境內姦貪官吏兵商民人等利其貨賄代爲姦細走透消息於外或招引外境姦細入境內探聽事情然後觀我虛實知我淺深乃敢窺伺或侵犯邊疆或詭詐申請甚或欺罔陳奏畧無忌憚是故制御□□必先以嚴內治爲本防微杜漸臣等又不得不預爲之慮也除將該國事情及我緣邊關隘并境內姦細備行廣西

鎮守及兩廣都布按三司轉行各該守巡兵備叅將等官嚴督勘報及各謹守境土并查提究問外如蒙乞勅禮兵二部將該國事情從長查議請乞聖裁候命下之日備行臣等欽遵施行實爲便益等因奉旨這該國事情着從長查議來說該部知道欽此欽遵抄出送司查得嘉靖三年十月內該總督兩廣軍務都御史張嶺題前事看得安南國請封雖該本部掌行緣彼國無定主事未歸一難以施行內稱各相構兵係干邊情重務已經備咨兵部徑自查照去後今該前因案呈到部合行仍咨兵部煩爲徑自查照施行等因咨部送司看得前

木洲奏請
忠肅書院
事先該總督兩廣軍務都御史蕭翀等題該本部議擬
題奉旨是這所奏安南事情着總督都御史督令鎮守
守巡等官戒飭守邊官目恪遵舊規守把信地遇有彼
國差來使臣明白省諭他知道如或訪有別情係干邊
計該議處的上緊奏來處治欽此欽遵已經通行去後
續該禮部咨該總督兩廣軍務張嶺題內開緣邊關隘
并境內姦細已經備行廣西鎮守都布按三司轉行各
該鎮巡兵備叅將等官嚴督勘報及謹守境土并查提
究問外所據邊境別無餘情本部難再議行其該國所
奏請封納貢事情係隸別部掌行擬合就行爲此合咨

前去煩爲查照先今事理徑自查覆施行等因咨部送
司案查前事該本部看得請封雖該本部掌行緣彼國
無定主事未歸一難以施行內稱各相構兵係干邊情
重務節經備咨兵部徑自查照去後今該前因案呈到
部看得廣西巡按汪淵等題稱安南國王黎暲遇害無
子國人共立其故長兄黎灝之子黎諱以爲世子名位
甚正權攝國事經六七年臣主定分亦已甚久夫何一
旦被人脅遷於外國人皆不知之其莫登庸旣稱忠義
力能討賊何故視主蒙塵竟不迎復乃輒改謀易議別
立其弟黎慝權攝國事其間篡逆何怪羣疑况傳聞之

本洲考詩
言或云黎應年齡尚幼豈能權攝國事或云黎應雖稱黎應同母之弟但黎灝沒世已久焉能尚有幼子或者莫登庸既娶其母而後生子冒姓黎應亦未可知此雖黷昧夷情未易適度真偽即使黎應真黎灝之子黎應之弟則弟豈可以奪兄黎應乃一國共主而莫登庸輒敢易之則臣豈可以廢主今該國長慶府牒稱黎應要差陪臣奏事請封臣等會訪得該國擾亂未有定主乃輒朦朧差陪臣進貢求封中間又不明白開說所封何人姓名顯是立非相應國人不服或是姦雄謀篡假立詭名必有境內

姦細通透外夷假我天朝恩寵以服衆心以遂逆謀亦未可知今茲黎應黎應不俟本國平定輒遣陪臣請封於法固當禁阻戒備其或莫登庸伏誅黎應光復舊物差遣陪臣請封則名正言順人心允服臣等當亟訪得實具奏定奪萬一黎應倘致他虞別無嫡親宗裔黎應具其姓名差遣陪臣請封從之則遂其姦謀不從則別無應立叅酌定議有非臣下所敢擅專及引永樂年間該國篡賊黎季犛弑其國主陳日焜往事爲鑒要將該國事情從長查議請乞聖裁候命下之日備行欽遵一節臣等爲照安南國請封係是重事必須國有定主事

有歸一方可施行今該廣西巡按汪淵等將該國請封
事情會同鎮巡等官具奏前來中間反覆論列計慮周
詳已無遁情伏蒙明旨命臣等查議以聞此我聖明柔
遠之意洞見于斯臣等逐一叅詳鎮巡等官會勘前項
緣由則彼國無定主事未歸一灼然可知今一旦遽然
請封委難輕易擬行合無候命下之日本部移咨都察
院轉行彼處鎮巡等官再行訪勘本國即今有無平定
歸一其黎譙黎應是否已故國王黎暘親派宗裔應否
何人襲封多方博訪務得其真如果本國平定事有歸
一方許查照先年黎暘請封事體取具合國官民不扶

保結將應封之人具奏施行等因奉旨是着鎮巡等官
再行訪勘得實奏來定奪欽此欽遵已經移咨都察院
轉行彼處鎮巡等官訪勘去後今該前因通查案呈到
部又查得正德十年該國王黎暘差陪臣阮仲達等赴
京進貢之後迄今二十一年貢使不至及我皇上登極
改元欽遣編修孫承恩給事中俞敦齋捧詔勅往諭竟
以該國作亂道路梗阻未達而返節該孫承恩具奏及
節據兩廣鎮守等官具題再經本部題覆俱奉旨令彼
處鎮巡等官訪勘的實奏請定奪該本部備行去後今
經一十四年各該官員竟無一字奏報前來今照皇嗣

木沙奏言
誕生若復頒詔本國則必如前梗阻命使不得徑抵其
國徒損國體合無今次止行詔諭朝鮮國王其安南國
暫免遣使伏候命下本部行取翰林院官給事中疏題
請點差各一員止令齎捧詔書前往朝鮮國諭賚庶便
事體再照安南國職貢不修歷二十餘年背叛之罪已
無所逃在法當興問罪之師但節據奏稱該國賊臣作
逆國無定主分裂竊據荼毒生靈義當與之討賊平亂
斯爲中國君主四夷之道但查得兩廣鎮巡等官節奉
欽依訪勘迄無回報顯是輕忽邊情違慢明旨以致縱
長夷姦積損國體所據經該官員相應通行查究合無

乞勅兵部馬上差人星馳兩廣地方着落鎮巡等官即
便查照先年節奉欽依事理訪勘該國事情的實合同
三司及該道守巡官員從長謀議務要區畫停當上緊
具實奏聞不許隱匿遲違誤國大事庶幾叛亂之罪可
懲朝貢之典不廢裔夷以安邊境以寧而中國之體尊
矣

嘉靖十五年十一月初一日具題初三日奉聖旨是
詔使且待彼國事情你部裏還會同兵部計議來說
勿視爲非要欽此

則爲叛臣在我朝則爲逆寇罪大惡極法在必誅八寨長官司土官副長官瓏徹教化三部長官司土舍張澤通把李者來白俊等交通外夷引惹邊釁情犯深重法難輕貸內瓏徹見被外夷拘執固有自取縱死亦不足惜但瓏徹乃我中國職官豈可置之不究設欲舉兵進討而武嚴威係是外國亡命避居兩來之地勢難攻伐恐徒費兵糧卒難成功及欲將張澤據法拿問但各酋見與武嚴威等交通誠恐持之太急別懷異謀釀成大患深爲未便除一面嚴行鄰近一帶地方各整擗軍馬協力防守一面選委能幹土流官員前去撫諭務要瓏

徹挾取回任一節爲照交通外夷國有大禁蠢茲瓏徹蔑視憲章私與賊黨結姻濫受安南賄賂乃邊境之大蠹中國之罪人雖被拘留自取亡滅死有餘辜不足爲惜且賊黨武嚴威等違背彼國犯我邊境聚集有年相通日久守土官員不行禁止申報以致延禍地方論其情罪本當誅勦及守土失事官員亦合查究但事在彼中難以遙度旣該撫鎮等官會奏相應議處合候命下備行雲南撫按衙門會同總兵官嚴督該道守巡兵備守備等官親詣前項地方速行各該府州縣衛所整擗軍馬鋒利器械分撥緊關隘口輪番防守加謹提備如

遇賊黨武嚴威等奔突即便協力相機追剿毋容逃遁
入境貽害地方一面先行撫諭瓏徹妻男照舊管理本
司約束夷民保守境土毋或驚疑一面選差能幹曉事
士流通把人等前去宣布朝廷恩威殺伐利害諭以順
逆禍福務將瓏徹取回正以國法不許效尤如或中間
事情重大另行斟酌停當徑自具奏以憑上請定奪毋
得輕率啓釁貽患責有攸歸等因題奉旨是欽此欽遵
備咨前來臣等會同兵部尚書張瓚等計議前事爲照
安南國古稱交趾秦并天下於此置象郡在漢爲九真
日南象三郡五代時爲劉隱所并至宋初始封爲郡王

然猶授中國官爵勳階如特進檢校太尉如靜海軍節
度觀察等使如賜號推誠順化功臣皆例待以內地之
臣未始以國稱也其後封南平王奏章文移猶稱安南
道宋孝宗時始封以王稱國而天下因以高麗真臘視
之不復知爲中國之郡縣矣其先李氏傳八世陳氏傳
十二世至日焜爲黎季犛所篡我太宗皇帝時季犛上
表竄姓名爲胡一元子蒼易名奩詐稱陳氏絕奩爲甥
求權署國事朝廷從其請逾年陳氏孫名添平者始遁
至京愬其實季犛乃表請迎添平歸還以國朝廷不逆
其詐遣使送添平歸抵其境季犛伏兵殺之并及使者

事聞太宗皇帝震怒徧告於天地神祇聲罪致討遣征
夷將軍朱能副將張輔等征之生擒季犛及其子蒼澄
獻俘京師詔求陳氏遺裔立之國人咸稱爲季犛殺之
盡無可繼者乃復古郡縣其地立交趾都布按三司及
各府州縣衛所諸司一如內地之制其後有黎利者乃
夷中之夷復設謀肆逆詐以求得陳氏後爲詞上表請
立我宣宗皇帝謂此皇祖意也遂聽之即棄其地俾復
爲國蓋我太祖高皇帝開國之初陳氏首先納款故著
之祖訓不許後人伐其國者嘉陳氏之能輸誠效順首
先臣服之忠也詎意陳爲賊犛所戕遂絕其祀卒之天

道好還而賊利逞克復滅季犛之宗可見亂臣賊子天
必殛之而覆轍相尋無可逃者然黎利旣幸而得國傳
之子孫所當嚴奉天道恪守職貢敬神恤民毋敢怠忽
庶可以世食茲土今乃廢職不修棄民不保自正德十
年黎暲差陪臣阮仲達進貢之後迄今廿一年朝貢之
使不至廢棄正朔罔秉臣節今據兩廣守臣所奏則黎
譟黎應皆非黎暲應立之嫡莫登庸陳暲等俱屬
篡逆之臣及按該國長慶二府牒文所云則其國中交
爭割據逼主弑君綱紀蕩然冠履倒置且兵戈相尋互
相魚肉則地方分裂生靈塗炭不問可知且敢於背叛

朝廷儼然自肆既不行人貢以奉王正又不來告變以請天討昏迷不恭反道敗德莫此爲甚該禮部先議移文體勘責以守臣奏報不過詰問所由欲備知其曲直所在然彼國黎氏失守宗祧既不上告天子其逆臣交亂又皆各據土疆俱屬背逆天道干犯王法春秋大義亂臣賊子人得而誅矧聖天子在上繼天立極君主華夷而該國負固作逆久不來庭所據彼國事情罪狀顯著無所逃於天討如蒙乞勅錦衣衛選擇指揮千百戶內素有膽氣謀畧言語便利通達事機者二員先領勅書一道前往廣西地方着令鎮巡等官仍選彼處軍衛

有司官員人等能深曉夷情熟知道路強幹有謀者三五員名伴送勅使徑入安南境內勘問彼國背叛朝廷久不入貢緣由并見今篡主奪國罪人姓名根究的實作急奏報仍乞朝廷下令選將整兵待報而發臣等又照得安南疆域東起廣東之欽州迤西歷廣西之左江至雲南之臨安元江爲界而廣西龍州乃其所必出之路而憑祥州則其要害也西財由臨安府經蒙自縣河底之蓮花灘至其東都可四五百日程耳我太宗皇帝初征安南以兩路之兵分道並進一由廣西思明府憑祥州入一由雲南臨安府蒙自縣入合無乞一面勅鎮守

兩廣總兵官安遠侯柳珣會同兩廣巡撫錢如京一面
乞勅鎮守雲南總兵官黔國公沐紹勛會同雲南巡撫
胡訓貴州都御史汪珊即便整搦漢土官軍調度錢糧
嚴備待命再照雲南奏稱武嚴威等係安南國亡命避
罪出逃犯我邊疆及羈執我土官瓏徹雖法不可容但
據聞彼國逆臣構亂已非一人武嚴威舍彼就此必非
篡國之賊抑或不忍視主受醜不肯甘心從逆亦未可
知合無乞勅錦衣衛另選如前能幹官二員齎領勅書
一通前往雲南體勘武嚴威事情責令鎮巡等官差本
處的當人員前往八寨長官司等處地方及直抵武嚴

威營內密諭朝廷以安南久不朝貢又知國中逆臣篡
主方興問罪之師若武嚴威果因同列篡逆避罪而逃
即便明諭禍福順逆如能革面向化歸附我軍往征彼
國則向來擾亂邊疆羈執土官諸所罪犯俱一切赦宥
如瓏徹被拘在彼即令與武嚴威解釋宿怨協心從征
其瓏徹交通之罪亦一體開赦但彼國見今作亂事情
許武嚴威等備細開陳及其歸附實情作急奏報以憑
降勅調遣委用如其不服則當置之度外俟王師至日
一併誅剿臣等竊惟有苗弗率大舜舉徂征之師扈氏
不恭夏啓有于其之誓則討罪之兵聖王所不能已况

大司馬九伐之法賊賢害民則伐負固不服則侵放弑其君則殘而蠹茲安南實負三罪是其上千天討自速滅亡聲罪正名已無容議但興師伐遠命將討罪事體重大合無恭請宸斷勅下兵部會集在廷文武多官從長計議為今之計首宜慎擇大將遴選偏裨簡設總督糧餉文臣更置地方有司官員調集諸路兵馬所在儲峙芻糧一一區畫停當上請定奪施行將見天聲所震囚壘來降蕞尔小夷固可傳檄而定矣

嘉靖十五年十一月初八日具題十三日奉聖旨是安南國先此詔書不論而返有傷體面又久不入貢非叛而何兩處差官都依擬着實勘明奏報便寫勅與他去興師備討必行兵部便會同議奏欽此

獻未議請明詔以推恩臣民用全典禮疏

臣仰惟九廟告成祀典明備皇上尊祖敬宗之心奉先思孝之實可謂曲盡而上下二千年間百王所不克行之與我皇上一旦舉而行之蒐講稽訂協於大中真足以考諸三王而不謬百世以俟聖人而不惑矣斯禮也自當著為一代全經以告萬世豈臣一時所能揚厲而悉陳之惟是本朝功臣配享在太祖太宗廟各有其人自仁宗以下五廟皆無似為缺典至於臣民不得祭其始祖先祖而廟制亦未有定則天下之為孝子慈孫者尚有未盡申之情臣忝禮官躬逢聖人在天子之位又

屬當廟成謹上三議瀆塵聖覽倘蒙采擇伏乞播之詔書施行天下萬世不勝幸甚

計開

一請定功臣配享議臣按書盤庚曰茲予大亨于先王爾祖其從與享之則祖先王而以功臣配享其來舊矣載考之禮凡有功者皆與焉不拘拘於文武也歷代相承率循是典莫之有易而其尤可信者在漢則曰祭功臣於廟廷在魏則曰祀尚書令荀攸於太祖廟若唐以下尤其彰暉自高祖以至憲宗或六七八人或一二三四

人宋自太祖至光宗亦各有人如魏徵李沆司馬光皆文臣也不必皆有武功若李靖郭子儀曹彬潘美輩也其列祖諸帝莫不有配但有多寡爾亦不必開國如高光文皇太祖也据是而觀則本朝太祖太宗適國家多事固有豐功茂烈之臣所宜配食及仁宗以下雖國家承平無事武功而其間相與輔贊以成太平之業者亦未必無一二魏徵李沆之流也今考之國典自中山王徐達以來以至永義侯桑世傑凡十二人以配享太祖自河間王張玉以至榮國公姚

廣孝凡四人以配享太宗自仁宗以至武宗五廟皆無有焉何則蓋本朝配享之臣多重武功若文臣得配惟劉基姚廣孝二人而已臣愚以爲勸禍亂於已然者固在武臣弭禍亂於未萌者則在於文臣其功不惟相當先儒尤以爲過之是以在漢魏以下並以文武功臣配享况我仁宗以來君明臣良百餘年間朝廷清明天下無事而其元臣碩輔能與守文太平之主共天下之福享其榮名踰數十年至今賴之此其功亦不可誣苟棄而不錄廢而不祭殆非所以增

重祖宗之德業以爲臣子之勸也伏乞循先代祖宗並有功臣配享勅下禮部會同吏部翰林院詹事府國子監歷考自仁廟以下五廟文武大臣中從公評究本末差次輕重必審其實必當於理不徒虛尙文飾以苟塞人情必其功在當時澤在後世者然後取以爲配使光預元祀之列則正惟有功者不負而未有功者亦知所勸且足以昭列祖持盈之功而又以啓聖子神孫於無窮其爲裨益蓋不細也

一乞詔天下臣民冬至日得祀始祖議臣按宋儒

程頤嘗修六禮大畧家必有廟庶人立影堂廟必有主月朔必薦新時祭用仲月冬至祭始祖立春祭先祖至朱熹纂集家禮則以爲始祖之祭近於偏上乃刪去之自是士庶家無復有祭始祖者臣愚以爲頤深於禮學者司馬光呂公著皆稱其有制禮作樂之具則夫小記大傳之說不王不禘之義彼豈有不知哉而必爾爲者意蓋有所在也夫自三代而下禮教彫衰風俗蠹弊士大夫之家衣冠之族尙忘祖遺親忽於報本况匹庶乎程頤爲是緣情而爲制權宜以

設學此所謂事逆而意順者也故曰人家能存得此等事雖幼者可使漸知禮義此其設禮之本意也朱熹顧以爲僭而去之亦不及察之過也且所謂禘者盖五年一舉其禮最大此所謂冬至祭始祖云者乃一年一行酌不過三物不過魚黍羊豕隨力所及特時享常禮焉爾其禮初不與禘同以爲僭而廢之亦過矣夫萬物本乎天人本乎祖豺獾莫不知報本人惟萬物之靈也顧不知所自出此有意於人紀者不得不原情而權制也邇者平臺召見面奏前事伏蒙

聖諭人皆有所本之祖情無不同此禮當通於上下惟禮樂名物不可僭擬是爲有嫌奈何不令人各得報本追遠耶大哉皇言至哉皇心非以父母天下爲王道者不及此也臣因是重有感焉而水木本原之意惻然而不能自已伏望皇上擴推因心之孝詔令天下臣民許如程子所議冬至祭厥初生民之始祖立春祭始祖以下高祖以上之先祖皆設兩位於其席但不許立廟以踰分庶皇上廣錫類之孝臣下無禘祫之嫌愚夫愚婦得以盡其報本追遠之誠溯源

徂委亦有以起其敦宗睦族之誼其於化民成俗未必無小補云臣愚不勝惓惓

一請詔天下臣工立家廟議夫自周以上自天子以至大夫士皆各有祖廟雖庶人亦各薦於寢至秦罷侯置守燔經滅學斯禮乃失於是天子之外無敢有營私廟者迨魏晉以降始復廟制許文武百官立家廟以官品爲所祀世數之差然而或位至通貴猶不營廟至有官爲立以愧之者有詔許立廟羣臣無肯倡衆建立至勤詔旨切責者是豈獨其禮教衰廢安故習常而然

哉亦由古今異儀封爵殊制事固有礙而當時
 禮官又不能講求典禮制為定論使人有据依
 是以當時士大夫雖有詔旨顧望疑憚而不敢
 即建立耳臣忝叨禮職方以為懲敢依倣古今
 酌為中制以俟采擇布之天下謹按三代時有
 五廟三廟二廟一廟之制者以其有諸侯有卿
 大夫有上中下士之爵也而今之官職既與之
 異且無冢嫡世封之重又無山川國邑之常若
 是而欲竊取古人之制而為之是誠所謂刻舟
 以求劍膠柱而鼓瑟也必不獲矣漢為曹公立

五廟晉為安昌公立六代後魏為胡珍立五廟
 至北齊以下以從二品以上祀五代五品以上
 祀三代七品以上祀二代或五廟四廟三廟二
 廟一廟彼皆過於泥古而不可行者也至宋大
 儒程頤者出乃始約之而歸於四世雖上自公
 卿下及士庶以莫不然其言曰自天子至於庶
 人五服未嘗異也皆至高祖服既如此則祭亦
 須如此其疏數之節未有可考但其禮必如此
 七廟五廟亦只是祭及高祖若止祭禰是為知
 母而不知父非人道也朱熹以為最為得祭祀



之本意禮家以爲大夫有事省於其君子祫及其高祖此可爲立三廟而祭及高祖之驗後儒亦皆謂程子言有服者皆不可不祭其說甚當由是觀之則廟數雖有多寡而祭皆及四親則一也以是差之則莫若官自三品以上爲五廟以下皆四廟爲五廟者亦如唐制五間九架廡兩旁隔版爲五室中祔五世祖旁四室祔高曾祖禰爲四廟者三間五架中爲二室祔高曾左右爲二室祔祖禰若當祀始祖先祖則如朱熹所云臨祭時作紙牌祭訖焚之然三品以上雖

得爲五廟若上無應立廟之祖不得爲世祀不遷之祖惟以第五世之祖湊爲五世只名曰五世祖必待世窮數盡則以今之得立廟者爲世祀之祖而不遷焉四品以下無此祖矣惟四世遞遵而已至於牲宰俎豆等物惟依官品而設不得同也蓋古者於四親之廟有日祭月祀時享疏數之不同而今皆不可考不敢妄爲之說然而皆在祭中不可缺廢則貴賤一也是以因其可知而缺其所不可知是亦厚於孝養而不爲過也若夫庶人祭於寢已無可說矣伏

乞詔令天下使小大庶官皆得据而爲之凡唐
宋以來一切三廟二廟一廟四世三世二世一
世之制繁雜破碎多礙而少通者一切除去之
一以五室四室爲率庶幾三代之制程朱之義
通融貫徹並行不背所謂不規規於往古之迹
而亦不失先王之意在是矣惟聖明斷而行之
幸甚

奉聖諭各陵碑亭諸妃墳所立石如式疏

查得先該本部尙書夏言面奉聖諭景皇帝陵碑偏置
門左非宜可建亭於陵門之外大門之內庶稱尊崇又
節奉聖諭太宗東西并二妃墳并憲廟十三妃墳俱宜
各立石碣表識欽此又奉聖諭金山各妃墳所之祭俱
宜併入天壽山各陵殿配祭金山墳祭罷免欽此欽遵
傳奉到部臣等看得恭仁康定景皇帝陵碑偏置門左
未稱尊崇委宜作亭蓋覆以示瞻仰其太宗東西并二
妃墳并憲廟十三妃墳原無表識委宜立石以上俱係
缺典誠如聖諭所當舉行合候命下本部移咨工部差

禮部奏

忠禮書院

官恭詣各該處所逐一相度規制并擬立石碣處所畫圖貼說徑自奏請發下所司如式建造完日該部仍行翰林院擬名書刻再照列聖諸妃安葬異所没而有靈未免依侍帝側所據歲祭祀禮宜併入各陵殿內一體致祭墳所之祭相應罷免合著為令仍行太常寺欽遵施行

嘉靖十五年十一月初十日具題十二日奉旨依擬欽此

奉聖諭皇嫂孝靜皇后加十二字全謚疏

嘉靖十五年四月內該本部尙書夏言於天壽山行宮面奉聖諭皇嫂孝靜皇后謚用六字於禮未備還用全謚庶合典禮卿部裏可具題行欽此欽遵續於九月十四日文華殿面奉御筆欽定孝靜皇后謚為孝靜莊惠安肅溫誠順天偕聖毅皇后傳捧到部臣等竊謂制謚者先王之法定謚者聖王之公邇因孝靜皇后懿行純德作配武宗母儀天下先該本部議稱帝后媿美禮宜與並武宗廟號既與列聖相同今日后謚似不當稍異時衆論未協既而賴我皇上聖衷獨斷始獲歸一茲者

禮部奏

卷之二十一

二十八

忠禮書院

皇上復念孝靜皇后與列聖元后事同一體特降綸音親灑宸翰加以十二字之號以備全謚可謂曲全於禮無復遺議凡在臣工罔不欽服睿見高明盛德光大誠有以協萬世之公全一代之典也垂之史冊益有光矣所有改題神主合候命下本部擇日另行題請通行內外衙門欽遵施行

嘉靖十五年十一月初十日具題十一日奉旨是着輔臣李時題

宗廟告成恭請瞻視以伸聖孝疏

臣等竊聞宋儒朱熹有言天地間有兩件極大事其一天地不當合祀南郊其一不爲太祖特廟自東漢以來千餘年間無人整理臣等嘗備觀典籍每起敬於朱熹之言而乃今躬逢我皇上以首出百王之資建萬世不刊之業上下二千餘年宇宙內大事如熹所願望而不復見者今一朝共舉不數歲而郊廟之制大成誠非聖人在天子之位曷克至是哉又獻皇帝廟卜營吉址更正隆名聖孝顯親於是爲大茲廟庭一新神人快覩且耐主有期該本部題請十二月初十日十一日十二日

舉行奉安大禮初七日太常寺奏齋畢伏請聖駕卽是日恭詣太廟太宗廟昭穆羣廟及皇考獻皇帝廟瞻視適觀厥成以伸皇上尊奉祖考至誠至敬之情仍乞勅令文武百官恭候於太廟門首俾得以瞻仰宮牆之美不勝慶幸

宗廟告成奉安神主禮儀疏

祠祭清吏司呈照得恭建太廟太宗廟昭穆羣廟祧廟俱已告成所有奉安太祖列聖帝后及四祖神主一應禮儀呈乞題請施行案呈到部臣等竊惟駿奔對越洛邑揚清廟之歌寢成孔安商人著殷武之頌是皆廟成始祔而祭之之詩也在昔有聞于今爲烈茲者恭惟我皇上稽古制禮創天子七廟之制特全太祖之尊別立太宗不遷之廟此曠百王所不克舉之事而一旦有成甚盛典也今新廟告成禮儀肇稱祔主之祭以妥安祖宗列聖在天之靈所有合行禮儀謹恭擬開坐上請裁

定伏候命下欽遵施行

嘉靖十五年十一月二十日具題廿二日奉旨依擬

奉欽諭兩宮徽號議擬疏

嘉靖十五年十一月廿五日該本部尙書夏言於文華殿欽奉面諭茲者宗廟告成將布詔覃恩海內唯是兩宮皇太后未隆徽稱朕心未安卿宜議擬來聞欽此臣等仰惟皇上肇建宗廟實萬世不刊鉅典尊祖奉先之孝於斯至矣仰惟兩宮皇太后日擊朝廷熙事誠宜加上徽號以極尊稱斯於皇上下大孝顯親禮隆義備臣等不勝慶幸謹恭請於奉安神主之後擇吉舉行合候命下本部行移翰林院定擬加上昭聖康惠慈壽皇太后章聖慈仁皇太后徽號字樣上請簡定勅下本部具儀

禮部奏議

忠禮書院

題請施行禮成一併詔示天下庶尊祖敬親之道光先振後之典可以垂示於無疆矣

嘉靖十五年十一月廿六日具題廿八日奉旨是欽此

皇嗣誕生大慶合行儀注疏

儀制清吏司案呈恭遇皇嗣誕生既已詔告天下所有三月命名剪髮之儀理當舉行案呈到部臣等仰惟皇天眷聖列祖儲休篤生元良萬邦攸賴肆惟養正之始當隆稽古之儀謹按禮經宜于三月之末之期合於本月望後選吉舉行臣等謹將合行儀注開坐上呈御覽伏乞聖明定奪勅下遵行

計開

- 一 欽天監擇皇子剪髮吉日上請
- 一 先期太常寺備告太廟太宗廟昭穆羣廟獻皇

禮部奏議

卷之二十一

三十二

小禮書院

帝廟香帛脯醢酒果翰林院具祝文

一欽命皇子雙名該用載字行下字用上邊傍字樣先勅內閣開擬上請聖明簡定

一前期一日上詣太廟寢殿并分遣文武大臣恭詣太宗廟昭穆羣廟獻皇帝廟以命皇子名告聞于祖宗列聖皇考

一是日上以命皇子名遣使聞于昭聖康惠慈壽皇太后章聖慈仁皇太后

一前期上擇內夫人之敬慎者使為師姆及慈姆保姆以奉皇子剪髮是日早師姆抱皇子於寢

宮剪髮為鬢留角如禮鬢所存留不剪者也夾
囟兩旁當角之處留髮不剪者謂之角又云夾
囟曰角兩髻也

一是日命皇子名上具皮弁服御乾清宮陞御座
皇后率昭嬪各具服朝見行四拜禮畢皇后侍
立東面昭嬪後師姆抱皇子出自寢由西至殿
內授皇子于皇后內贊奏曰皇后方氏率昭嬪
王氏敢用吉日祇見皇子上降座命以制辭執
皇子之左手咳而賜之名皇后敬對承旨畢遂
左還授皇子于師姆還寢皇后復率昭嬪四拜

畢各還宮

一次日上御奉天門欽降手勅以皇子睿名傳諭

禮部行移宗人府上籍玉牒

嘉靖十五年十二月初五日具題初八日奉旨依擬

欽此

請補六科都給事中陪祀宗廟疏

祠祭清吏司案呈奉本部送禮科抄出禮科都給事中李充濁等題稱宗廟訖工奉安神主都給事中乞要比照郊壇事例陪祀一節臣等聞得清廟之詩曰於穆清廟肅雝顯相濟濟多士蓋侈助祭之多也故孔子謂四海之內各以其職來祭漢楊雄謂寧親莫大乎得四海之歡心皆此意也恭遇皇帝陛下道德冲穆禮樂制作鼎建大祖列聖廟重新獻皇帝廟漢唐宋因循而未行夏商周講求行之而不盡者一旦新復盡制為萬世快覩臣等何幸躬逢之也臣又考會典所錄郊饗上帝而

駿奔之列則六科都給事中與焉至于宗廟之饗缺六科不載然周詩孔子漢儒莫不嘉助祭之多者蓋以自古帝王生嘗受百官之覲而孝子孝孫致饗於廟也則率百官竭精誠以事之然百官猶有所限制如今日文官五品以上武官四品以上得陪祀者蓋序爵也六科係朝廷耳目之臣都給事中又叨六科之首得以郊壇陪祀者蓋近臣也况陛下事天明事地察事祖宗孝其精誠一也而六科獨陪祀於郊壇而不與於宗廟於古無以稱周詩肅雝多士之文於今無以殫近臣夙夜寅清之念况太祖高皇帝配饗上帝時已降監六科在奏

假之列而專饗於太廟也乃缺六科又無以昭陛下事郊廟一體之敬也然臣聞會典於祀廟而不載六科者以昔之廟庭未濶而官之羣聚難容若今陛下宏開列聖之宮應備六科之士故臣以謂陛下至誠大孝塞乎天地孚于神民臣民歌誦子孫憲式是爲萬世立德也又廟貌天開靈神燕安禮制酌乎百王文物備于千代芳聲茂績信今傳後是爲萬世立功也會典一書雖創自先朝而備於陛下若陪祭之臣補六科之缺仍望勅史官錄示以詔將來且臣查得六科都給事中每歲郊祀例得入壇陪祀初不以品級爲拘惟是宗廟祭祀乃

不得與似於事體不一况六科列署內庭官聯禁近而
都給事中又六科之長似應准令陪祀庶郊廟之禮不
缺而事同一體伏乞聖明裁允以垂定制

嘉靖十五年十二月初八日具題初九日奉旨准陪
祀

宗廟告成請加上兩宮徽號字數疏

先該本部具題加上兩宮徽號等因奉旨是欽此已經
行移翰林院定擬上請簡定昨該內閣傳出兩宮徽號
並加二字臣等切惟國家典禮惟太皇太后皇太后名
分既殊徽稱亦異今日兩宮皇太后尊同行輩名分不
殊其加上徽號字數誠宜一體即日會同內閣大學士
李時議得昭聖康惠慈壽皇太后徽號原係六字今當
加上二字聖母章聖慈仁皇太后徽號原係四字今當
加上四字庶位號並隆情至義備而尊崇之典合乎禮
矣臣等不勝祈請之至謹奏

嘉靖十五年十二月初八日具題初九日奉旨兩宮
行輩同尊本是相等非姑婦也但皇伯姆原係皇兄
所上二字故今似多耳昨輔臣及今卿等但言宜今
次並以八字上之依擬行翰林院擬來看欽此

宗廟告成請上兩宮徽號合行禮儀疏

儀制清吏司案呈嘉靖十五年十二月十九日節該本
部尚書夏言欽奉聖諭明日南郊等處奏祀告祀改于
廿七日子時行禮上冊兩宮以來月之三日七日各行
卿其卽刻示所司行欽此欽遵傳捧到司查得先該本
部尚書夏言欽奉聖諭加上兩宮徽號即用廿四日同
行前期三日奏南郊告北郊宗廟社稷俱命官當廿一
日行禮欽此該本部具儀題請奉聖旨依擬欽此又該
本部題開加上兩宮徽號合用金冊金寶等件行各該
衙門撰造等因奉旨是日期改擇於來月內行欽此欽

遵今奉前因案呈到部爲照加上兩宮徽號既奉有前
項聖諭於來月初三日初七日各行禮所有二日合行
禮儀理宜另行開坐上請伏候命下欽遵施行

嘉靖十五年十二月初八日具題

計開

一欽定嘉靖十五年閏十二月初三日加上昭聖
恭安康惠慈壽皇太后徽號初七日加上章聖
慈仁康靜貞壽皇太后徽號先於十二月廿七
日子時奏告南郊北郊祭告太祖廟太宗廟昭
穆羣廟獻皇帝廟社稷該分遣官十二員行禮

先期太常寺預備脯醢果酒翰林院具告祝文
一先一日內侍官設冊寶案二于奉天殿冊東寶
西設冊寶綵輿二于丹墀內設香亭二于冊寶
輿前教坊司設中和韶樂及大樂錦衣衛設鹵
簿大駕

一先一日女官設昭聖恭安康惠慈壽皇太后寶
座章聖慈仁康靜貞壽皇太后寶座于兩宮中
各設冊寶案二于寶座前冊東寶西設香案于
冊寶案前設皇帝拜位于兩宮丹陛上正中設
內贊二人引禮二人內官陳設儀仗于兩宮丹

陛丹墀東西女官擎執者立于寶座之左右鐘鼓司設樂于兩宮丹陛東西北向

一初三日鳴鐘鼓文武百官各具朝服于金水橋南北向序立上冕服御華蓋殿鴻臚寺官奏請行禮導駕官導引上出至奉天殿捧冊寶官捧冊寶置于案內侍官舉案由殿中門出導駕官導引上隨行至丹陛下捧冊寶官取冊寶置于綵輿內侍官舉輿上陞輅隨輿後導駕官退冊寶綵輿至金水橋南百官皆跪候過畢輿後隨上詣昭聖皇太后宮百官後隨至宮門外序立

上至宮門外降輅趨至門內北向立女官請昭聖恭安康惠慈壽皇太后陞座昭聖恭安康惠慈壽皇太后具服出導從如常儀樂作陞座冊寶綵輿由中門進至宮中丹陛上置于皇帝拜位前冊東寶西內導引官導引上由左門入至丹陛上左邊北向立樂止內贊唱執事官各司其事奏就位內導引官導引上就拜位奏拜樂作四拜樂止傳唱鴻臚寺官傳贊百官皆四拜畢內執事官于綵輿內取冊寶捧由中門入至昭聖恭安康惠慈壽皇太后前左邊西向立上

由左門入至拜位奏跪傳贊百官同奏搢圭進冊捧冊官以冊跪進于上左上受冊獻畢以冊授捧冊官捧冊官跪受于上右置于冊案奏進寶捧寶官以寶跪進于上左上受寶獻畢以寶授捧寶官捧寶官跪受于上右置于寶案奏宣冊宣冊官詣案取冊跪于上左宣訖置于冊案奏宣寶宣寶官詣案取寶跪于上左宣訖置于寶案奏出圭俯伏興傳贊百官同奏復位內導引官導引上由左門出至拜位奏拜樂作四拜樂止傳贊百官同四拜畢致詞官于丹陛跪奏

于上左曰皇帝臣御名伏惟昭聖恭安康惠慈壽皇太后陛下功德兼隆顯崇徽號永膺福壽率土同歡畢奏拜樂作四拜樂止傳贊百官同四拜奏禮畢

一初七日加上章聖慈仁康靜貞壽皇太后徽號行禮如前儀致詞同

一謁謝儀

一初三日上冊寶畢內官先具謁謝儀物上具禮服奉昭聖恭安康惠慈壽皇太后具冠服詣奉先殿行謁謝禮用祝文品物行禮如常儀

一初七日上冊寶畢內官先具謁謝儀物上具禮服奉章聖慈仁康靜貞壽皇太后具冠服詣奉先殿行謁謝禮畢復詣崇先殿行謁謝禮俱用祝文品物行禮亦如前儀

一受賀儀

一初三日昭聖恭安康惠慈壽皇太后行謁謝禮畢仍御宮中服燕居冠服陞座儀仗及樂如前陳設內導引官導引皇后皇貴妃皇妃皇嬪憲廟皇妃武廟皇妃公主六尚等女官并宮人各具禮服詣昭聖皇太后宮慶賀行八拜禮畢內

官內使各行五拜三叩頭禮

一是日文武百官詣昭聖皇太后宮前門外上表慶賀行四拜禮司禮監官捧表進仍行四拜禮畢

一初七日章聖慈仁康靜貞壽皇太后行謁謝禮畢仍御宮中服燕居冠服陞座儀仗及樂如前陳設內導引官導引皇后皇貴妃皇妃皇嬪憲廟皇妃武廟皇妃公主六尚等女官并宮人各具禮服詣聖母章聖皇太后宮慶賀行禮如前儀

一是日文武百官詣聖母章聖皇太后宮前門外
上表慶賀行禮俱如前儀

一初四日命婦進表行慶賀禮前一日女官設昭
聖恭安康惠慈壽皇太后寶座于宮中設香案
于丹墀之南是日清晨內官設儀仗于丹陛東
西及丹墀東西女官擎執者立于寶座之左右
陳女樂于丹陛東西北向設表案于殿左門外
設命婦拜位于丹墀北向設司贊位于丹墀東
西設司賓位于命婦拜位之北東西相向設內
贊二人位于殿內東西命婦至昭聖皇太后宮

門外司賓引命婦入就拜位女官具服侍班如
常儀尚宮尚儀等官詣內奉迎尚儀奏請昭聖
恭安康惠慈壽皇太后陞座昭聖恭安康惠慈
壽皇太后具服出導從如常儀樂作陞座樂止
司贊唱班齊樂作贊四拜樂止外贊唱進表引
表案女官二人前導舉表案女官二人舉案由
殿左門入樂作至殿中樂止贊衆命婦跪內贊
唱宣表展表女官詣案前取表跪展宣表女官
詣案前跪宣訖與女官舉表案置于殿東外贊
命婦皆興樂作四拜樂止司賓引班首命婦由

東階陞樂作自殿左門入至殿中樂止內贊唱
 跪班首跪衆命婦皆跪內贊官跪于班首之左
 代致詞云某夫人妾某氏等恭惟昭聖恭安康
 惠慈壽皇太后陛下洪慈厚德允協徽稱壽福
 隆長羣心歡戴畢內贊司贊同唱俯伏興班首
 及衆命婦皆興司賓引班首由殿右門出降自
 西階樂作至拜位樂止贊拜樂作四拜樂止尙
 儀跪奏禮畢昭聖恭安康惠慈壽皇太后興樂
 作還宮樂止導引官引命婦以次出
 一初八日命婦進表慶賀章聖慈仁康靜貞壽皇

太后前期陳設并行禮俱如前儀致詞同

禮部

忠禮書院

太司前與刺結并谷豔垣收前第文同

奉聖諭皇后助奠儀注疏

該本部題嘉靖十五年十二月初七日該本部尚書夏
 言欽奉聖諭古者天子有事於廟后助奠獻茲者廟制
 既已復古皇后宜與事宗廟以明婦職卿其考議來聞
 欽此欽遵臣等竊惟古者天子后妃共事宗廟所以協
 誠同敬謹按禮經曰夫祭也者夫婦親之所以備內外
 之官盡陰陽之義也仰惟皇上至誠大孝凡古聖王宗
 廟之禮講求殆盡茲議皇后倣古助奠之儀協相禮事
 仰見聖心稽古盡誠奉先思孝可謂極至而無以加矣
 今新廟告成稱祀之始禮文尤當隆備本月初十日奉

禮部

卷之二十一

四十四

忠禮書院

安太祖神主十一日奉安太宗神主十二日奉安獻皇帝神主各入廟至期合請皇后恭詣各廟行事謹具皇后助奠儀注上請伏乞聖明裁定

嘉靖十五年十二月初八日具題初九日奉旨皇后助奠本是古禮之正况我皇祖初制命婦亦有陪祭之文卿等考據詳正但目今倉卒了且待議別行計開

一初十日卯時上具祭服皇后具服詣奉先殿導引官導上至太祖神主前女官導皇后至高皇后神主前太常寺官跪奏請神主詣太廟奉安

上捧太祖主皇后捧高皇后主各奉陞輿冊寶衣冠後隨內侍官各擎傘蓋如儀上步行皇后隨至奉先門外上陞轎皇后陞轎由景運門出至廟街門入至太廟門外儀衛退上降轎皇后降轎神主輿至丹陛上少停導引官導上女官導皇后蔽以步障並詣神主輿前太常官跪奏請神主降輿上捧太祖主皇后捧高皇后主詣太廟各奉安于神座冊寶衣冠各置于案上就位皇后亦就拜位次上拜位稍右典儀唱迎神奏樂內贊奏上詣香案前奏跪奏搢圭奏上香

上三上香奏出圭奏復位樂止內贊奏四拜上
四拜平身皇后同傳贊百官同典儀唱奠帛行
初獻禮奏樂內贊導上詣帛案前奏跪奏進圭
進帛官捧帛跪進于上右奏獻帛上獻訖上詣
太祖神主前捧爵官捧爵跪進于上右奏獻爵
上獻訖奏出圭上出圭訖高皇后神主前捧爵
官捧爵跪進于上左奏獻爵上獻訖奏復位內
贊奏跪上跪皇后亦跪傳贊百官同樂暫止內
贊贊讀祝讀祝官讀訖樂復作內贊奏俯伏平
身皇后同傳贊百官同樂止典儀唱行亞獻禮

內贊導上詣太祖神主前皇后詣高皇后神主
前各獻爵如初獻儀皇后前導贊俱用女官奏
樂樂止典儀唱行終獻禮儀同亞獻奏樂樂止
太常卿進立于殿東西向立唱賜福胙內贊奏
跪搯圭光祿卿捧福酒跪于上右內贊奏飲福
酒上飲訖光祿卿捧福胙跪于上右內贊奏受
福胙上受訖奏出圭俯伏興平身奏四拜上四
拜平身皇后同傳贊百官同典儀唱徹饌奏樂
執事官徹饌訖樂止太常卿奏禮畢請還宮奏
樂內贊奏四拜上四拜平身皇后同傳贊百官

同樂止典儀唱讀祝官捧祝進帛官捧帛各詣燎位奏樂上退拜位之東立皇后亦退對上就西立捧祝帛官由中門出各詣燎位內贊奏禮畢納主回寢奉安冊寶衣冠各藏置訖百官先退導引官導上女官導皇后各幕次各易服還宮

一十一日午時上詣太宗廟奉安神主皇后行禮同前

一十二日午時上詣獻皇帝廟奉安神主皇后隨行拜禮同

大禮告成請慶賀儀注疏

仰惟皇上肇建宗廟以孝享祖宗列聖皇考實舉行二千餘年之曠典今茲大禮告成復加上兩宮徽號以極尊稱及布詔覃恩海內推廣至孝斯我皇上尊祖顯親之心誠至禮備仁浹義周可謂通于幽明達于上下而無間者矣誠帝王之盛節昭代之曠舉也中外臣民曷勝慶幸其稱賀之典及詔告天下禮儀一併舉行今擇於本月二十六日文武百官各具朝服上表行慶賀禮是日詔告天下謹將合行儀注開坐上請伏候命下欽遵施行

十五日奉旨依擬

計開

一前期一日鴻臚寺官設詔案表案錦衣衛設雲蓋雲盤于奉天殿內東別設雲盤于承天門上設綵輿于午門外鴻臚寺設宣讀案于承天門上西南向教坊司設中和樂及大樂于午門外鴻臚寺列百官班次于承天門外橋南是日錦衣衛設鹵簿駕百官各具朝服入丹墀內侍立上具冕服御華蓋殿鴻臚寺官引執事官進至華蓋殿就次行五拜三叩頭禮贊各供事鴻臚

寺官奏請陞殿樂作導駕官導上陞座翰林院官先捧詔書于華蓋殿從至御座前東立西向樂止鳴鞭報時雞唱定時鼓訖唱排班文武百官入班鴻臚寺官贊四拜樂作興樂止贊進表樂作執事官舉表案由殿左門入置于中樂止贊宣表目宣表目官宣訖贊俯伏興贊宣表贊百官皆跪宣表訖贊俯伏興序班撤表案于殿東隨舉詔案于殿中贊四拜樂作平身樂止百官出至承天門外伺候鴻臚寺官贊頌詔翰林院官捧詔授禮部官禮部官捧詔書置于雲盤

內案上校尉擎雲蓋俱從殿左門出至午門外
禮部官捧詔置綵輿內樂作公侯伯三品以上
官前導迎至承天門上鳴贊唱排班引禮官引
文武百官就拜位樂作贊四拜樂止唱宣讀詔
書陞案稱有制贊衆官皆跪禮部官捧詔書授
宣讀官宣讀官宣訖禮部官捧詔書置雲盤中
贊俯伏興樂作四拜樂止唱進笏鞠躬三舞蹈
跪唱山呼萬歲者三唱出笏俯伏興樂作四拜
平身樂止序班報鴻臚寺官跪奏禮畢駕興百
官以次出禮部官捧詔書授錦衣衛官置綵輿

中以綵索繫於龍竿頒降禮部官捧詔書置于
龍亭內鼓樂迎出禮部授使者頒行天下

奉議內殿神主奉安景神殿禮儀疏

先該本部尙書夏言前面奉聖諭宗廟告成神主奉安之後奉先殿崇先殿神位宜暫奉安於景神殿以便來春二殿之修欽此隨該本部擇吉日具題奉聖旨是欽此欽遵臣等竊惟內殿神位暫奉安景神殿比與神主附廟之禮不同謹將奉安禮儀恭擬開坐上請伏乞聖裁候命下行令內外衙門欽遵

嘉靖十五年十二月十六日具題本日奉旨依擬着廿四日辰刻行朕親捧皇祖位欽此

計開

欽天監擇到本年十二月十八日午時吉暫請
內殿神位奉安于景神殿

翰林院撰告文

太常寺備辦祭告脯醢酒果于奉先崇先二殿

欽定捧請太祖列聖獻皇帝神位文武大臣九
員捧請列后神位內臣七員俱吉服行事

先期一日司設監設神位輿并香亭于內殿俱
丹陛正中內監各衙門移內殿神座及諸香案
供器儀物安設于景神前後二殿錦衣衛備傘
仗候于奉先門外

一是日早上具常服以奉安神位告于奉先殿次
告于崇先殿禮畢內外請神位官恭捧太祖列
聖帝后神位獻皇帝神位各奉置于輿先行上
步行至景運門西神位輿行上目送神位輿至
後左門外上還宮神位輿出中左門東角門左
順門東華門東上門東上南門永泰門至景神
殿左門至大門至丹陛上內外官請捧太祖列
聖帝后神位奉安于景神前殿神座捧獻皇帝
神位奉安于景神後殿神座捧神位官俱上香
行叩頭禮禮畢退

本洲奏言

忠社書院

奉旨定太廟祫祭禮儀疏

祠祭清吏司案呈照得嘉靖十五年十二月廿八日恭
 遇皇上行大祫禮於太廟查得嘉靖十年正月初六日
 本部欽奉勅諭朕惟郊廟之祀未有不同所以尊事天
 地祖宗者也惟太廟享祀制宜未稱孝敬之情仰惟太
 祖高皇帝重闢宇宙肇運開基聖德豐隆神功偉盛不
 得南面居尊甚非所宜當朕聖祖在御固宜尊德祖居
 尊其在今日當以朕聖祖為始祖居始祖之位欽此及
 查欽定祀儀成典大祫圖叙國初立四親廟考正大祫
 至我皇上敦復古禮親定圖式季冬大祫奉德祖居中

圭州奏議

卷之二十一

五十二

忠社書院

而懿祖熙祖仁祖以次列焉又自太祖而下太宗仁宗宣宗英宗憲宗孝宗武宗以次列焉但近該本部尚書臣夏言節奉旨諭祫祭宜以四祖同我太祖並皆南向庶見太廟爲特尊太祖之義欽此今宗廟新成肇舉大祫之祀禮宜更正三祖及我太祖高皇帝位次以爲萬世享祀定制等因案呈到部看得禮合羣廟之主而祭於太祖之廟是爲大祫是祫祭之禮所以合祭羣廟之主而于太廟者亦以尊太祖也且太廟者太祖之廟也三祖者尊於太祖固不當與昭穆同序太祖者太廟之主又豈可與子孫並列今仰遵聖諭凡祫祭之日宜奉

太祖以上五祖神御並皆南向庶足以伸皇上尊太祖之心又足以體太祖尊三祖之心矣茲者今月廿八日肇修大祫之禮于太廟請宜更正以德祖居中懿祖居東次之熙祖居西次之仁祖居東又次之太祖居西又次之俱正南面之位自太宗而下六聖之位則左右序列一遵舊制不惟我太祖別於羣廟之主而懿熙仁三祖亦得以全其尊我皇上尊祖之禮情至義盡真足以垂範千萬世矣合候命下行移太常寺遵照陳設仍付史館更正纂入祀儀成典著爲定制施行

嘉靖十五年十二月廿三日具題廿六日奉旨是着

著爲令

宗廟告成上兩宮徽號慶賀行禮儀注疏

儀制清吏司案呈嘉靖十五年十二月十九日該本部
尙書夏言節奉聖諭明日南郊等處奏祀告祀於廿七
日子時行禮上冊兩宮以來月之三日七日各行卿其
即刻示所司行欽此欽遵傳奉到司案查先該本部題
前事嘉靖十五年十二月十三日奉安神主畢上御奉
天殿文武百官上表行慶賀禮等因奉旨依擬欽此隨
該本部題爲宗廟告成請上兩宮徽號事該本部尙書
夏言欽奉聖諭茲者宗廟告成將布告覃恩海內惟是
兩宮皇太后未隆徽稱朕心未安卿宜議擬來聞欽此

仰惟皇上肇建宗廟實萬世不刊鉅典兩宮皇太后目擊朝廷熙事誠宜加上徽號以極尊稱等因題奉旨是欽此本年十二月初七日該本部尙書夏言欽奉聖諭加上兩宮徽號即用廿四日同行欽此本月初九日又奉聖諭百官表賀當候兩宮徽號禮成一總行之茲十三日可罷舉欽此欽遵擇於本月廿六日文武百官各具朝服上表行慶賀禮是日詔告天下將合行儀注開坐上請具題奉旨依擬欽此又該本部題稱加上兩宮徽號金冊金寶等件行各該衙門撰造應用等因題奉旨是日期改擇于來月內行欽此今奉前因通查案呈

到部查得舊例加上徽號禮成即於後一日文武百官上表稱賀是日詔告天下茲者宗廟大禮告成百官表賀先奉聖諭當俟兩宮徽號禮成一總行之今復奉聖諭上冊兩宮以來月之三日七日各行其稱之典及詔告天下相應一併舉行合無照例於本月初八日文武百官上表稱賀即日詔告天下惟復另行欽天監擇日上請伏乞聖明裁定其合行儀注俱照先次題准事理欽遵施行

嘉靖十五年十二月廿三日奉旨擬擇於十五日之前取一日行

議定王府宗廟武臣家廟疏

近該臣以宗廟告成具題前事開列三議欲乞皇上推廣聖孝以及臣民蓋錄功臣一也令天下得祀始祖二也令品官立家廟三也疏既上伏蒙召見文華殿仰承聖諭以臣三議具有可采尙俟暇日欽定施行又蒙聖諭問及天下王府宗廟之制今不知盡能如禮否卿亦須有定議臣於此仰見皇上錫類之周退而考求今天下王府宗廟亦無定制茲我皇上創建祖廟復古重典斯禮也欲推而達之天下誠當自宗室始臣謹作王府宗廟并武臣家廟議二通開坐進呈聖覽伏乞播之詔

本洲考言
忠祖書院
令通行臣不勝幸甚

計開

一請詔令天下各王府立廟議臣惟今天下親王郡王將軍中尉即古之同姓諸侯也王制諸侯五廟二昭二穆與太祖之廟而五太祖者始封之君也禮諸侯不敢祖天子若有大功德于王特命立之則可如魯有文王之廟是也而後儒尤謂非禮之正非是而得備五廟者以異姓初封如太公之屬是也我朝雖有親王祭仁祖廟儀而未聞祀太祖之說其亦以太祖身爲天子

非諸侯可得而祀之也是則今之宗室上不得僭擬天子以伸一已之情下又不能盡同品官以備五廟之制百十年來初無定典即有孝思之誠無由以伸合無爲之定制凡親王始封俱未得立廟止令于每祭先時敬遣親臣赴京助祭至期則望拜於其府其始封王之子始許立一廟始封王之孫得立二廟始封王之曾孫得立三廟始封王之元孫得立四廟始封王六世之孫始得備五廟而俱以始封王爲百世不遷之祖二昭二穆以次而祔親盡則祧名曰家廟

而郡王將軍中尉共在一城居住者則同祭於親王之廟不復另祀始祖而止以高曾祖考之不得預者別立廟以祀之如與親王同高祖者則止別立廟祀會祖考與親王同會祖者則止別立廟祀祖考與親王同祖者則止別立廟祀考遞至五世則以始封郡王者爲世祀之祖餘以次遞遷若將軍中尉立廟之制宜如三品以上官遞至五世則亦以始封將軍中尉者爲世祀之祖餘以次遞遷名曰家廟其親王宗廟之制中爲始祖廟左二昭右二穆各有門堂寢室

而墻宇四周焉其郡王別立廟者則宜總爲一廟前殿後寢俱從內間而分之爲五室其將軍中尉別立廟者悉如品官之制五間九架厦兩傍隔版爲五室其後爲寢室此其大畧也伏乞聖明裁定勅下遵行

一請詔令武臣立廟議臣惟國家武臣公侯伯即古所謂異姓諸侯者古者諸侯立廟同姓異姓俱無異制今武爵雖重亦得兼師保之官如文臣者其建封之制與古不同則凡制禮自當降于親王而同於品官矣臣請視品官爲之定制

凡公侯伯立廟俱祭五世始封一人即爲世世
祀之之祖高曾以下禮得遞遷而止至五世服
窮親盡則祧藏于別室斯正禮也然公爵爲最
重自國初以來有始封公而既歿進封爲王者
有襲封公而既歿進封爲王者此其制並宜從
公其立廟之制亦宜如唐制總爲一室五間九
架分祀五世與文官同名曰家廟至於武臣三
品以上亦宜並倣前制庶乎禮制均一而上下
通行矣伏乞聖明裁定詔示武臣俾知遵守

宗廟新成肇稱殷祀一應禮儀更正疏

祠祭清吏司案呈照得宗廟新成肇稱殷祀一應禮儀
俱從更正所有各廟捧主官及分獻代祭官合行禮節
先該本部尙書夏言節次面奉聖諭茲合恭擬開列上
請以便遵守施行等因案呈到部臣等看得宗廟之禮
所尙嚴肅以致誠敬今後凡遇時禘之日捧主官先候
立於羣廟之門俟上入太廟門太常寺執事人傳報太
宗廟次傳報昭穆羣廟各捧主官始俱請各廟請主每
廟太常執事官二員導引神主俟太宗主先出過仁廟
門約行三丈餘地次仁宗主出次英宗主出次孝宗主

出皆以次導引以行俱相遠三丈餘地右穆廟同至太廟門導引官止太宗主先入次仁宗主次宣宗主次英宗主次憲宗主次孝宗主次武宗主以次陞丹陛至殿外立恭俟上捧太祖主出至殿內各官捧羣廟主始俱入殿及祭畢俟上捧太祖主回寢各官捧太宗及列聖主亦以次而出若遇大禘上先捧德祖主出各捧主官捧懿祖熙祖仁祖太祖主以次出祭畢回寢禮同其捧羣廟主儀與時禘同至於分獻代祭復命義當有辨如特享上親獻太廟捧主官分獻羣廟大禘時禘上獻德祖太祖各官分獻列聖是皆代上獻也非遣祭也事畢

俱不當復命其或不親祭與有事或不親告欽遣大臣行事是上命之代攝也非分獻也祭畢次日禮當復命但合用連名具題不必人各一跪庶事體歸一亦免章奏頻煩仰瀆聖聽謹遵聖諭恭擬上請伏乞裁定勅下本部行移太常寺一體欽遵施行

嘉靖十五年閏十二月十二日具題十四日奉旨依擬欽此

桂洲奏議

忠正書院

桂洲奏議補遺目錄

辭免陞僉都御史疏

陳情被誣乞休疏

陳辨尚書霍韜誣奏疏

欽奉聖諭發示昭聖皇太后書及太后令內侍

持進皇上帖子疏

以上四疏係照文集補

桂洲奏議

目錄

忠正書院

以上四節論辨文法

林聖土部子願

大奉坐論為不部聖皇太司書又次亦令由

東前如致之林願

東前如致之林願

東前如致之林願

東前如致之林願

辭免陞僉都御史疏

節該吏部為缺官事題奉聖旨夏言陞都察院左僉都
 御史管院事欽此臣伏蒙簡注越出尋常退省踈庸倍
 增跼蹐竊念臣忝塵諫職于茲累年曾無絲毫有裨治
 理尚賴天度包荒幸免誅責詎意去歲臘日蒙恩改調
 濫居六科侍從之首今年春仲賜勅獎譽特加四品服
 色之榮又祇奉溫綸勉臣盡職遇有聞見所宜直陳臣
 實抱空疎無能稱塞屬緣朝廷建立大事仰履聖慮蚤
 夜不遑竊欲獻其愚忠方有待於暇日久虛德意深用
 矜慙豈謂大恩重加登進竊惟僉都御史為內臺要職

列在大僚所以繩糾百官邪慝肅清朝廷紀綱乃古御史大夫之任中丞執法之司視都給事中言責雖均而體貌特重自非謇諤獨立忠亮自許才負經濟志先國家者恐不足以秉憲度於朝端植風聲於天下是宜博采必付真材顧臣何人乃辱茲選况臣昨奉勅旨監視巡察郊壇工程責任重大專方經始未効微勞而遽受新恩恐妨成命臣聞宋臣包拯劾罷三司使宋祁尋以拯代祁歐陽修有蹊田奪牛之譏緣前僉都御史李如圭係臣薦舉賑濟乃竟出撫邊鎮今以臣代之擬之拯事雖用情不同而形迹近似夫以拯之忠鯁尚且取譏

於修以修之直亮猶不能信拯則臣之不肖惡能免於人言以上二事皆臣心未安伏乞聖慈矜察特寢新命俾臣仍守舊官別揀英賢以重風紀臣極知官非卿正例不當辭然情出懇誠有不容已干冒宸嚴無任感恩待罪之至

嘉靖十年五月二十二日進次日奉聖旨爾才學老成風力素著茲特簡用况該部會推非朕所私宜卽到任管事但爾既這等說特准所請著照舊供職支四品俸吏部知道

陳情被誣乞休疏

近因順天府府尹劉淑相犯事聽人指使無故誣引及
 臣該臣具實辨奏伏荷皇上日月之明俯垂照察將淑
 相逮送鎮撫司併問命臣安心辦事臣感激聖恩心跡
 既白即復黽勉供職外不意自淑相下獄後臣僚中為
 淑相代草誣臣之詞至於連篇累幅橫加詆毀及有為
 之陰謀游說却持上下力與營救又以誣詞傳播衍惑
 羣聽明以脅臣旬日以來更相煽構挾弄狙詐恬無骨
 恥殊駭見聞臣竊悲夫士習至此國體何賴深切危懼
 誠不知所以自謀伏念臣猥以賤愚本無才德誤蒙聖

明非常眷遇實千載一時臣感戀大恩誓當盡瘁豈敢
復顧其他惟是臣過叨寵榮之被不勝讒忌之攻辛卯
之夏祇因郊工垂成遂構起危禍非上賴天造親賜照
雪則臣冤死地下久矣豈得尙有今日當時之事亦是
此輩爲之今者之舉意復類是臣若不見幾引避猶復
強顏在列竊慮小人無良讒言罔極旦夕必且意外生
事共爲不靖雖恃有聖明在上不爲所惑而臣橫受詬
辱終不能以自安且臣忝列孤卿大臣素被簡注天下
之所觀望使其名譽宜著足爲朝廷之光其或身名毀
辱足傷朝廷大體是爲榮辱非關一人此臣所以夙夜

慚懼而進退無所容措者也臣聞高而必危滿則招損
無實之名造物所忌加以臣才非適用智不周身旣不
能阿時以取容又不能過防以遠害每論事切直惡惡
太嚴爲人所不喜是以謗叢怨積皆臣有以取之况臣
比歲憂病相仍精神竝耗兼久嬰亡血之疾內損已多
詢之醫工謂宜少卽安閑時以藥食假之歲月庶幾不
至大憊臣是以萬不得已冒死陳情伏望聖慈念臣孤
危憫臣疾苦賜臣休假暫遣還鄉俾就醫藥庶獲保全
聲名有益目前事體臣儻未溢先朝露尙當有報國之
日臣非敢於蒙恩効力之時輒忍言去但危迫私棕計

無出此惟陛下憐而察之慨賜允可實感天地再造之恩臣不勝戰慄激切伏藁俟命之至

嘉靖十五年七月二十五日進奉聖旨卿才識明敏體國忠誠朝廷典禮方切倚毗豈可偶因浮言輒以求去搆煽之詞多出怨忌之口不足憑信朕已具悉何足介意勿再來辭

陳辯尙書霍韜誣奏疏

近該南京禮部尙書霍韜因劉淑相事公然出身黨護引律奏臣朦朧爲已故大學士費宏請謚以爲奏事增減緊關情節法當坐斬以宏得謚文憲爲犯憲宗皇帝徽號所當更正已而給事中錢薇具奏意與韜同中間有大臣不宜互相攻擊之論節奉聖旨大臣宜同寅贊治勿相詆擊臣固知霍韜本沾沾小人器狃無賴况所言紕繆一知法律不諳典禮已不能逃於聖鑒臣是以仰奉明旨不敢復置辯也昨因霍韜具奏申明禮儀等事爲禮科都給事中李充濁等論列無故誣臣主使言

官以爲姦黨牽引劉淑相構臣受賂之詞以爲姦賊仍以請謚一事坐臣死罪以爲不當汗秩宗入宗廟立朝行其辭鄙褻狂悖非臣所堪若謂臣才德弗稱不足以備大臣功勤無聞不足以當隆眷經濟靡見不足以匡聖治名實未孚不足以厭公論此則臣心素以爲媿爲歉不待人言者也韜不以此論臣責臣而乃舉吏胥牙僧之賤行苞苴囊橐之鄙事妄加於臣將以污巖名節姦險亦甚矣夫祖宗列聖之治天下除祖訓律令大而不可易者所當世守外至於因時立法隨事定制變通因革自有不能盡同而霍韜本緣私意欲以箝制六科

便遠引尙書奏事侍郎寫旨以爲太祖定制又以翰林官不迴避六卿爲宣德正統年間失禮又以爲楊榮楊士奇等陰壞舊制然不知今昔事體不同者或出於當時朝廷之詔或繇於累朝臣下之建白未有不奉旨而敢擅更者也大臣物故子孫請謚者例行吏部查取有無曾經言官論劾而第其上中下之行爲之請謚其有奉旨舉行者則例不行查宏以輔臣歿于位又該內閣大學士李時題奉欽依一應卹典本部查議舉行與前此席書桂萼事體相同皆未嘗行查也今霍韜遂妄引律條以爲增減情節又以宏賜謚文憲爲犯憲宗純皇

帝徽號爲禮官罪尤爲無稽蓋擬謚出於翰林賜謚繇於欽定實與本部無干但典禮所係果屬干犯臣亦豈敢棄禮而不之舉正夫謚以易名節以一惠周公作法上下同之未聞謚之有諱也是故周天子之謚有文武成康宣穆當時之臣如晉文公不諱文王衛武公不諱武王魯成公不諱成王齊康公不諱康王楚宣公不諱宣王秦穆公不諱穆王蓋惟其行不惟其分此周道也且憲本廟號非徽號也廟號且諱則謚尤當諱也若曰謚所當諱則憲宗純皇帝之純字是已然則太宗文皇帝之文不尤爲所當諱者乎然本朝謚文憲者三人矣

成化間賜謚彭時正德間追謚宋濂又如黃福劉大夏竝謚忠宣是爲犯宣宗許進謚恭毅倪岳謚文毅是爲犯武宗楊守陳章懋儲瓘諸人謚文懿是爲犯懿祖若如其言皆當改正者也夫前此皆不以爲諱而何獨疑於憲廟乎霍韜以不經之言非禮之禮亂法詭辨不遺餘力以攻臣必欲致臣於死臣若不自引避則將來顯詆陰傷何所不至伏乞皇上察臣孤拙特賜保全放歸田里以謝兇人不勝幸甚

嘉靖十五年九月初五日奏次日奉聖旨覽奏具悉霍韜所說浮詞俱出私忿卿豈可因此輒求退避宜

照前旨卽出供職以副朕懷亦不必一一與辯該衙門知道

欽奉聖諭發示昭聖皇太后書及太后令內侍持

進皇上帖子疏

臣夏言等謹題今日伏蒙皇上遣司禮監太監張佐鮑忠溫祥齋捧聖諭并發示昭聖皇太后書及太后令內侍持進皇上帖子臣等不勝駭愕竊惟皇上事養兩宮孝敬無間施法臣民至公不私乃若張延齡罪惡稔積姦犯國典皇上寘之於理實宜奉祖宗法度有不容曲赦者在太后正當以大義滅親與衆棄之今乃私一罪逆之弟顧自貶屈朝廷名分卑詞乞哀又於聖駕秋祭山陵之期遽令內侍持帖衝突委的有傷大體臣等恭

讀皇上書諭仰見聖訓仁至義盡昭如日星真足以示
將來有關於宗社萬年之計者也所有奏書該張佐等
傳奉聖諭謹欽遵令中書官恭寫并緘封如式進呈但
聖諭令臣等播之中外及事下廷議臣等見得內侍所
持帖子尚未得真偽臣等當恭候嗣旨傳行謹將奏書
御筆原稿并太后帖子及司禮監題本俱隨本繳進謹
具題以聞

嘉靖十年十月初一日

桂洲奏議補遺終

跋

先相國文愍公奏議二十二卷以工部不寢聽金
鑰詩編爲二十帙刻于嘉靖己亥皆諫垣南宮之
建白登庸後奏劄見于文集集爲公晚年手定
省原刻奏議十之七公被禍時集昇壻吳憲副
今猶印行者是也而奏議板歲久散佚傳布寢踈
世罕知者之瑞之琳爲從兄弟皆少孤自先王父
繼文公際兵燹後家中落至瑞兄弟公之遺笏
蓋無復存者初不知有奏議一書乾隆壬戌癸亥
間大方伯河南鹿邑彭公諱家屏屢檄邑尹求

公奏議輒以文集應之即邑耆宿亦無知有此書者甲子春鉛山今少冢宰程公海蒼爲翰林在告時謁方伯于署見架上有此書方伯謂係自高曾世藏舊物內遺失玉字一帙嘗屢遣人往江寧蘇州書肆訪求補缺重爲鈔布卒不可得因程公係同桑梓并屬再爲蒐羅由是知公奏議另有專刻顧方伯憲體崇嚴地隔勢睽無從假讀會饒九憲副雲南趙州李公諱根雲行部過薊城往返物色公後裔琳乃持舉業數十首詩一冊謁憲副于饒一見歡如平生拂拭過情爰求憲副介於方

伯假觀此書方伯欣然許之并囑諭琳往見琳赴省投謁猥荷殊矚出示此書皆欵浹旬然此書猶不畀以歸踰月出付憲副李公李公乃專差檄送邑侯彭公俾轉付抄錄刻期令繳還瑞往領歸亟集子姪友人窮日夕分抄時丁卯仲冬明年正月琳親賫赴省呈還方伯復徵公遺像辦香瞻仰親題贊語更重爲裝罽方伯之美墻乎公者如此瑞兄弟議事重刊無從補缺丙子春

聖駕南巡瑞同琳裹糧至杭覬近

天子之光瑞因徧訪杭城書肆冀有原刻最後至一小

巷鬻舊書者書目中有此書亟欲購之賈人以時
 下希有之名書索價十金書猶遠在一縉紳家逾
 三日復往則書猶完整而遺失首帙瑞念方伯本
 遺第十帙合之即成完璧訾呵再三乃以一金易
 之歸即思覓梨棗而費重力綿祇嘆望洋積念忽
 逾十稔今年春瑞借琳始同覓工重梓卷仍其舊
 帙縮其半計字四十一萬有奇中秋後告竣嗚呼
 公之公忠大節彪炳宇宙照耀古今不繫奏議之
 傳與否兼有文集行世公之心畫全豹已露其
 半然奏議爲公立朝建白上結主知下澤民依

視明代名相爲獨多經名賢論定之成書不可不
 令天下後世讀之以爲景行論世之資也憶公
 被禍時崔夫人懷妊五月遺腹生先承公時內避
 妬外避仇輾轉伏匿于程嬰之手保孤記載之詳
 矣先承公生朝恩公歷瑞兄弟已經七世刻奏議
 之歲至今已二百二十七年矣板雖不存而書猶
 有壁中之藏蓋公不朽之業與二曜並垂雖暫
 蝕而復明其靈爽不昧呵護遺編一綫之傳數百
 年後旁見側出于方伯之家杭城之肆以歸之子
 孫瑞琳不肖無能光昭祖德然俾得藉手有所據

卷之三

卷之三

忠祖書院

十行世則方伯之旁采憲副之推轂不可弭
 忘杭城之訪購互成完璧尤非意計所逆料今茲
 之役寔室得以拮据就緒非公之靈在在默相
 之不及此此得原刻之繇于告成之日縷縷述之
 以見公之流光無窮并示不敢忘所自瑞兄弟碌
 碌虛度或藉以告無念爾祖于萬一也初公賜
 第郡城遂占籍世居焉故自朝恩公歷瑞兄弟及
 兒姪累世諸生皆籍上饒庠康熙甲寅乙卯搶攘
 後先王父始復歸貴溪桂洲故里云乾隆甲申仲
 秋下浣七世孫之瑞薰沐敬識

天味印

